


BWÀKABUULWIBWÀ, NSHAPITÀ

MWINÁYÌ CITÙPÀ I

 Amen. Mukalenge àtumbè. [Katùpà kàà mukàbà wa mèyì munda mutupù—Muf.] . . .-nkààyendè. Ngeela meeji ne ki lwidì lwà bantu bààbûngì ndwòlò alu. Mbimpè byà kacya, wèwè mwakunyàànyì wa bakàjì udi kwaka wàwa, citùminu cyà ndekeelu aci. Ndi bushùwà ncyànyisha be. Nènku tudi . . . balwè mu dilòdòlò dyà Cidimu Cipyacìpyà ncyèna ngeela meeji ne udi mufwànyine kwimba cingà cintu citàmbe bwimpè, anyi citàmbe kukùmbànyine bwà dilòdòlò edi to.

² Mbimwèke ànu bu ne tudi tubanga cidimu bimpè; uh-huh, pambèlu mpimpè ne pàdì nêjè ne patotàkàne, ànu menemene mutù kuulu kwà Indiana mu cikondo cyà cidimu eci. Pa nàнку nwenù bàdì bafùmìne ku Georgie ndi nnumòna apa, ne bàà mu Ohio mwàmwa. Mpindyewu, Mwanèètù Dauch, wèwè ne Mwanèètù wa bakàjì Dauch nudi bamanyè mùdìbi, bu mùdìbi byà mwomùmwè ne mu Ohio. Nènku . . .kàdi, tuyààya mu Buloba mwikala kamùyì nànsha cìmwè cyà ku byòbi to. Uh-huh. Ki bwalu abu's.

³ Edi's ndilòdòlò dyà Cidimu Cipyacìpyà, mulààdilu wàci. Nènku, mu bushùwà bwà bwalu, muntu yònsò ùdi ne dilaya difùnda mwaba awu ne mucìpu uwìkala ne cyà kwenza bwà Cidimu Cipyacìpyà, pashìishe pàmbà ditùkù dyà màalaba kujika neyìkale minyangàkàjìibwe yònsò. Nàнку awu, nudi bamanyè's, nudi nubuulula dibeji dipyadìpyà, ne pashìishe nwalukila dindà didì dilonda, nucyènzulula kàbidì.

⁴ Kàdi kùdi ànu cintu cìmwèpelè cìndì—cìndì muswè kwamba, ne ciine aci ncyà bwena cyàkamba Mùpostòlò Pòlò ne: “Tupwa mwoyi bintu bìdì bimane kupita abi, bilemà byànyì byònsò ne bintu byònsò bìndì mwenze, ndi ndwijakaja mutàngile ku cimanyinu cyà dibìikila ditùmbùke dyà ku dyulu mu Kilistò.” Aci's ki tunynganyinga tùmwe tùndi naatù ntwà bilèmà byànyì bwà cidimu cishààle, ne citùpà cishààle cyà nsòmbelu wanyì, nènku ndi ànu mMulòmba ne didipwekesha dyònsò ngàsà bwà kulwijakaja mutàngile ku cimanyinu cyà dibìikila ditùmbùke dyà ku dyulu. Ndi mutwìshìibwe ne aci ki bujaadiki bwètù—bwètù bònsò, tudi bafwànyine kudyùmwwa mùshindù awu.

⁵ Mbibi be mùdici dilòdòlò dibi dyà mùshindù ewu ne—ne bantu kí mbapete mwà kulwa. Ki mèmè kubìikila Mwanèètù Neville, ncìvwa nànsha mumanyè ní ùvwa mwà kufika kaaba aka anyi to. Ki dibà adi Mwanèètù Skaggs kulwaye, wa bwalu mmufùmìne lwà mu Kentucky mwàmwa mùdi nêjè mwicikile

metre umwe anyi bipicile apu muntwamu. Nànku awu. . . Anyi ne: “Byàmba kwikala *nènku's*,” mwàkambaye, ki kukèngelabi ne cidimè kampànda amùkokè misangu yàbùngì ne kumubàndisha lwà ku kakùnà ne katumbà. Nènku ki mèmè kudyàmbidila ne: “Èè, piikalabi ànu byàlà bibìdì anyi bisàtù, kabyèna ne bwalu to, uh-huh, pàdìbì ànu nànku awu.” Kàdi njila yìdì mímpe mwà kwendelamù ne bantu bwònsò bàdì bèndelamù.

⁶ Mpindyewu, mu bushùwà bwà bwalu, dilòlò edi ndilòlò ditwàtèèleja mishindù ne mishindù yà bambi, bashiilèshiiilàngàne bàdì balwe. Nènku pàmwàpa nebàtùngunuke ne kulwila mu bitùpà bishiilèshiiilàngàne dilòlò edi, too ne mundankùlù. Ngeela meeji ne nebàsòmbe ne kutàngila ní. . . bwà Cidimu Cipyacipyà kuya. . . kutwàdija, ne cikùkulu aci kushiyaci kaaba. Nènku pa ciibidilu batu bàbiikila bantu ku cyoshelu ne bàsambila ne—ne benzela Nzambi malaya ààbò ne benzulula malaya ààbò—ààbò.

⁷ Mèmè kwambila Mwanèètù Neville. . . Ki mèmè kumubiikila bwà kumòna ní ùvwa ùlwa. Mèmè kwamba ne piikalaye kàyì mulwe to, nènteete bwà kutungunuka ne mwànyì pàànyì mwònsò. Ne pashiishe bu yéyè kàyì mwà kufika mwab'ewu maalabà mu dindà to, mòna's, ndi mufwànyìne kutungunuka ne kwenza cyònsò cìmvwà mwà kwenza piikalàye—piikalàye kàyipu apu. Nènku mvwa mumwambile ne mvwa ne cyà kuteeta dilòlò edi, ngeela meeji ànu mwà kwenza diyiisha dyà tusunsa tutwe ku dikumi ne tutaanu, anyi cintu kampànda. Nènku, tudi tumòna ne nudi ne bambi bakwàbò bààbùngì basòmbe mwab'ewu, bindile.

⁸ Nànku mvwa. . . ndyambidila ne mvwa mwà kutwadija ne kutungunuka ànu mu Mukàndà wà Bwàkabuulwibwà ewu, kupweka ànu naawu, kwangata nshapitá mwi'4 mpindyewu, kubangilapù. Kàdi twètù katùyì bamujikije cikondo eci, cikondo cìdì cilonda netùtungunukepù. Pashiishe kuya ku mwi5, ne mwi6, nènku ànu ne mwètù mwònsò. Mukalenge àtùkwàcisheku bwà twètù kumujikija.

⁹ Ndi muswè kwamba, kumpàla kwà twètù kutwadija, ne kùvwa. . . mvwa ne dikùmbudiibwa kwènji katancì kakesè dyà kùdì—dyà kùdì. . . Mwanèètù Drummond Thom ne mukàjèndè. Ewu ntatwèndè ne mamwèndè bàdì basòmbe kaabà aka dilòlò edi aba. Nènku mbafùmineku ku dyalukila ku Áfrikè kuvwabo munkaci mwà kwenza masangisha manène à disùngila misùukà ne masangisha à dyondopa dyà kùdì Nzambi. Inábànza mutekète ewu wàkaya nendè, ngeela meeji, kwà kakwèndè mujkàjì, dínghà ditùkù, ne mwikàle ne disangisha dyà mu bùlokò, ne bangènzàmpèkààtù kulwabò kùdì Mukalenge, ne bikwàbò byònsò. Bivwa ànu bilenga be mùshindù ùdì Nzambi ùkwàta mudimu ne babàke batekète abu. Mpindyewu bàdì mwab'ewu mu Àmèrikè bwà katancì kakesè bwà kwenza mudimu kampànda wa butangadiki.

¹⁰ Piikala ní nganyi wa kunùdì nwénù bampaasàtà...ndi muswè kufùndila Mwanèètù Drummond...Drummond, mémè, èyowà, ntu ncyòmpakaja dínà adi dyònsò. Bwà cinyi kavwaku ànu mwà kwangata dínà dímpe dyà mu Anglais ne kupwa adi mwoyi? Twánjibi kumupèesha nombà kampànda, nudi bamòne bishi, bwalu ncyèna mwà kukòòkesha aci to, to. Ncyèna ngeela meeji ne cyàbibìdì cyètù cìdì mwà kukòòkesha to. “Drummont,” ngeela meeji ne, ki mùshindù mujaalàme unùdì nudishindumuna; ne Mwanèètù wa bakàjì Charlotte. Piikala ní nganyi wa kunùdì muswè kubààkidila, ndi bushùwà muswè kubuumvwa babwele mu èkèleeziyà wenù.

¹¹ Inàbànzà awu, Mwanèètù wa bakàjì Charlotte ewu, ùdì ànu mwànà cyanàànà. Yèyè ùvwa ufila bujaadiki kuntwaku kukaadi katanci, kùdì Meda, bwà dilabula òvwaò bapìcìle mu Àfrikè, kàdì ndi nnwambila ne cìvwa...Billy, cyàkatùvùlwija bikondo byà kale abi kàbìdì; byenze bu kwakula kwà Afrikaans. Nènku mvità mmitùngùnùke kuntwaku ànu mùdiyi mwaba ewu emu.

¹² Piikala ní nganyi ní nganyi muswè kwakidila Mwanèètù Drummond bwà...ne Mwanèètù wa bakàjì Charlotte, bwà kampanyè mu èkèleeziyà wendè, pawikala muswè, ùbìikile ànu Mwanèètù Tony Zabel kwàka ku MELrose 7-3945. Panwikala baswè kuyifùnda, bàmwè bàà ku nwénù bambi, ndi bushùwà nnwambila bwà Mwanèètù...Bwalu's mmuyiishi mwimpè, nsongààlùme wa meeji matòòke, udi bulelèlèlè ukèngela kumutwisha mabòkò, bwà kubangilaye mwaba kampànda. Kàdì yèyè kèna ne bwowà to, nsongààlùme mwimpè, ne ntu mumunange bikolè be. Mpindyewu, nwavùluka, MELrose 7-3945. Nènku nènshiye karta kakesè aka mwab'ewu, bwà ne bu nwénù...Aci ki karta kààbò, nènku nwénù kanùyì bakùmbàne mwà kufùnda nombà awu to, èè, nudi mwà kulwa kukangata, anyi dìbà kàna dyònsò nàka paanyimà pàà mpùngà wa pankaci udi utàpulula masangisha mashiilèshiiàngàne dilòòlò edi. Nènku kwangata nombà wabò ne kubàbìikila panwikala baswè bwà kubààkidila mu yimwè yà ku èkèleeziyà yènù bwà disangisha kampànda, anyi muntu kampànda unùdì bamanye ne mmufwànyine kubààkidila, bwalu bàdì munkaci mwà kwenza masangisha à bukèbikebi mu Àmèrikè mujimà emu.

¹³ Aci kì mbwalu bwà dikèma anyi? Padìbì bikèngela bwà Àfrikè àtumè baamisiyònère muneemu mu Àmèrikè emu's! Muneemu ki mwaba ùdì ùkèngela kulwabo, muneemu mene, kutàmba mùdìbì kwaka nàka.

¹⁴ Nànku mbanganyi bàdì ne disànkà ne disànkishiibwa bwà ne Mukalenge mmunulaminyine mu cidimu cikwàbò? Nènku ki twètù aba, twenda tufika ku ndekeelu kwà njila. Ne tusambila bwà ne Nzambi àtùfwileku luse ku mpèkaatù yètù yònsò ne mapangila ètù.

¹⁵ Mpindyewu, ndi muswè kwamba nùnkù kumpàla kwà mémè

kubanga. Ndi njingila, muntu ne muntu wa ku nwênù bwônso, cidimu cipyacipyà cyà citàmbe ditanta ne cibènèshùbwe ne cyà makàndà à mubidi cîndî mwà kunùjingila. Nzambi ìkale neenù! Swâyi nukole mu byônso mu mubidi, ne mu nyumà, ne mu mpetu, ne mu bintu byà ku byanza. Byônso bidì Nzambi mwà kunùtwadila, ndi ndòmba bwà Yèyè kubyenza.

¹⁶ Mpindyewu mmémè ewu ntwadija cidimu cipyacipyà, mêmè mwine, ànu Nzambi ki udi mumanye cidì cindile mu cikondo cîlwalwà. Nènku bikèngela twangate mapàngadika ètù. Tudi ne byônso byètù. Mwanèètù Jim, kuntu kwàka, ukàadi mubilongolole mpindyewu, bwà mabiikila ne bikwàbò byà mu buloba bujimà, byà buloba bujimà; bwà kumòna mwaba wàtùlombola Mukalenge awu. Nènku ndi bushùwà ndòmba masambila ènù nwênù cisàmbà, bwà kusambila ne mwoyi wènù wônso bwà Nzambi kùitabikù bwà mêmè kulombodiibwa mu mùshindù mubì to. Ndi—ndi...bwà mu byônso bìndiku muswè kwikalà, nkwikalà ne meeji matòòke ne kubenga kwikalà mulombòdiibwe bibì. Nènku mpindyewu, mvwa mupicile mu cidimu cimpè.

¹⁷ Misangu yàbùngì, bantu bàtu bùmvwa maalù bibì. Nènku pàdìbo bàmba ne: “Mwanèètù Branham, udi—udi...kucyena uya mu myaba mùvwà ne ciibidilu cyà kuya to, ne bu mùdì bambi bakwàbò aba benza, ne biikale ne byônso...” Ntu—ntu muyiile cintu kampànda, ncyà kuyiila dileesòna dyà mu Bible ne dyà kùdì Mukalenge wètù, dyà ne Yesù kàvwa mwena madìleeji to. Yèyè—Yèyè kàvwa naawù to, Yèyè kàvwa ne nsòmbelu wa madìleeji to. Nwamònu’s, Yèyè—Yèyè kàvwa mwena madìleeji to, nànsha kakesè. Nènku ncyèna ngeela meeji ne bayiidi Bèndè bàvwa beena madìleeji nànsha. Kacya kabàtuku badyenze beena madìleeji nànsha.

¹⁸ S’ki mwaba awu ûndì ngeela meeji ne tudi twela dikùpà leelù ewu, (Pàmwàpa cidì ànu mmwènenù wanyì mêmè nkàâyanyì.) wa ne, pàdìbi bikèngela bwà twètù kwela bipungipungi bwà bwalu kanà bwônso, nudi bamanyè mùdì bwalu’s, ndi ngeela meeji ne bidì bitàmba kumwèka ne mbikàsa pamutù pà cintu cyà cijila.

¹⁹ Nuvwakù bamòne mu dilwa dyà Mukalenge, aba bààkaMwakidila bushùwà anyì? Ûvwa Simèònà, muntu nànsha umwe kàvwakù mwanjì kuumvwa cintu nànsha cìmwè pa bwalu bwèndè to, kàdi ùvwa mwindile Mukalenge. Mpofo Annà, mu ntempèlù amu. Yone Mubàtiji, mu cipèèla. Ne aba...

²⁰ Yone wàkaya mu cipèèlà pàvwaye ne bidimu citèemà, kààkamwènekakù kàbidì to too ne pààkakùmjàyè mvùla makumi àsàtù; mu cipèèlà amu. Ne bantu bu aba bààkiitabuujà mu musokoko, kàdi kushààla bapwekèle, bàvwa bindile dilwa dyà Mukalenge. Kàdi kabàvwaku beela mpungi bwà masangisha ààbò ne bikèngela bwà kubitèèkabù pa bimanyinu binène

nànsha (“Dîbà! Cikondo!”) ne—ne ku bisanji byà bindidimbi ne bikwàbò byònsò. Abi mbimpè bwà aba bàdi baswè kucyenza mùshindù awu, kàdi, bwànyì mèmè, aci kacyèna cìmwèka bu cyà Kilistò to.

²¹ Ndi mumanyè ne musangu kampànda bânà Bààbò kuMulondela, bàmba ne: “Wèwè ewu wenza bishimà ne bikwàbò ebi, cyÛdi kùyì uyiila ku—ku Yelusàlèmà ncinyi? Nènku netùye ku difestò dyà Paasàkà, bìikidisha Kaayifà mwakwidi munène, ne bwònsò abo, ne ùbàmanyisha. Ûbyenzèlà kumpàla kwàbò mùshindù awu, bwà kumònabo byenzedi Byèbè. Nènku mpindyewu, wamònu’s, cyÛdi wenda ukùtakeena ne musùmbà wà balobi, ne bikwàbò, ku musulù kwaka, ne musùmbà wà bantu bashààdile ncinyi? Ncinyi. . . Ncinyi cyÛdi kùyì ujuukila apa bwà kwenza ne bàà pa buloba bàcìmòne?” Nwamònu anyi?

²² Yesù wàkamba ne: “Dîbà dyènù dîdikù misangu yònsò, Dyànyì dîbà kí ndyanji kulwa to.” Uh-huh. Nwamònu anyi?

²³ Yone wàkadiku musangu kampànda. . . Yone Mubàtiji, Mi—Mifundu mmyakùle bwà dilwa dyèndè. Myámbe ne: “Pààlwàye, ne. . .” Mòna’s, Yeshàayi wàkamba, bidimu bitwè ku nkàmà mwandamutekète dikùmi ne bìbìdi kumpàlà kwà kulediibwayè ne: “Nekwikale dîyi dyà kampànda wela lubilà mu cipèèlà.” Ne kwamba ne: “Mikùnà yònsò neyitumpike bu twànà twà mikòòkò, mabèji ónsò neàtuutè bikàshi, myaba mitùmbùke neyìpwekeshiibwè, ne myaba mipwekele neyìbandishiibwè.”

²⁴ Bipròfetà byà mùshindù awu! Nudi nwela meeji bishi bwà bambi bàà ditùkù adi. . . Pààkangatàbo Cyòci aci, bàvwa ne cyà kwikala bàmbe ne: “Ekèlekèle! Pààlwà mupròfetà munène awu, bantu bwònsò nebàmumanyè. Nzambi neàtùululè bipooyì byà dyulu, tujila twà Dyulu netùpwekelelè pànshì, ditempu dyà kapyà nedìpweke pànshì, musùmbà wà banjèlò mumwele lwàci wènda ùpweka nendè pa buloba.”

²⁵ Pààkalwaye, ùvwa muiishi wa kale wa kwìsù kushitákane ne cipese cyà cisèbà cyà mùkòòkò cidijingila mu cifùka, mwikale ne cipese cyà ciseba citenga bu mukàbà. Pàmwäpa kàyiku mwòwè màyi to; mu ngondo yònsò yisàtù anyi yinaayi. Mu cipèèlà mwàmwa, ùpatukamù, wimana mu bitoci, bimushikidile ne mu binù, munkaci mwà kuyiisha ne: “Nyingàlalaayi, bwalu Bukalenge bwà mu Dyulu bùdi pabwìpi!” Yèyè kàakayakù mu bimenga to. Muntu ní nganyi yèyè muswè kumutèèleja, ùvwa ùpatuka ùlwa ku Yadènè bwà kumutèèleja, aba bàdi baswè abò. Cyàkenzàye ncinyi? Wàkanyukusha ditùnga dijimà, wàkanyukusha buloba.

²⁶ Kùdi dinyukishiibwa dìdì munkaci mwà kwenzeka dìdì bantu kabàyi bamanyè kantu nànsha kàmwè to. Pààkalwa Yesù, Yèyè kàakaDileejakù munkaci mwà bantu banène abu to. Wàkalwa kùdi Bèndè, Wàkalwa kùdi aba Bàvwà baMwindile. Ki

mwaba ùdi dinyukishiibwa dilwila awu. Ki cìdiYe wènza leelù ewu. Nyumà Mwímpè ùdi ùlwa kùdi aba bàdi Nzambi mubiikile. Kùdi dinyukishiibwa dinène munkaci mwà Basungula. Cintu cinène, cyà bukolè cidi munkaci mwà kwenzeka, kàdi bàà pa buloba kabèna bamanyè kantu nànsha kàmwè pa bwalu abu to.

²⁷ Bàdi beela meeji ne, cintàkanyi cinène cìdi cikoka ntema eci, ne tudyòmbà twà buloba bujimà, ne tèlèvisiyò, ne nzùbu yà yiyiila milliyò yà ndola, ne bikwàbò byònsò, ne abi ki bintu binène byà luumù. Aci ndikutakana ku mèsù kwà Nzambi. Nzambi kàtu utàngila bintu binène to. Cidi muntu ùbiikila ne “ndikutakana,” Nzambi ùdi ùcibiikila ne “Ncinène”; ne cìdi muntu ùbiikila ne “ncinène,” Nzambi ùdi ucibiikila ne “ndikutakana.” “KuMusànkishabi, ku dikutakana dyà diyiisha, bwà kusungila aba bàvwà bajimìne.”

²⁸ Mpindyewu, Yone. Nudi nwela meeji ne bàakamba cinyi? “Kùdi mukoleshi wa maalu wa kale kuntu kwàka, mulùmýàna wa kale wa kwísù kwònsò kushitákàne, mupatùkile mu cipèèla mwikale mudijingile cisèbà cyà mùkòòkò mu cifùka. Kàdi, mòna’s, mmwimàne mu bitoci, ku makàsà kutupù, kuntu kwaka ku mwelelu wà Yadènè, ne wenza maalu à lukutukutu kuntwaku. Nganyi ukààdikù muumvwe cintu bu nànkù?”

²⁹ Pàakalwa Yesù. “Maasiyà wetù ewu, mulelela lwà mu cikumbi mwàmwa, pa mushiki wà bisoosà, ne—ne ngombe mimunyungùlùkile yidila? Nènku—nènku udi uswa kwamba ne maamù. . . Mulela mu masandi, bu mùvwà tatwèndè. . . Maamù wàkiimita kumpàla kwà kabàyi nànsha banji kuswika dibàkà, mòna’s, Yèyè’s ùvwa mulediibwe pambèlù pàà dibàkà dyà cijila. Mwine muntu awu?” Kaa, ekèlekèle! Nwamònu anyi? Kàdi Cìvwa Cinène, kabàvwa ànu baCimanyè to. Nwamònu anyi? Kabàvwa baCimanyè to.

³⁰ Ne ki mùdi Èvànjeeliyò leelù ewu “Munène.” Ne Èvànjeeliyò ùdi munkaci mwà kunyukusha mùtùYe kacya kàyì mwanji kunyukusha kwònsò eku to, kàdi Ùdi unyukusha mu bashààdile. Ncyà bushùwà, munkaci mwà kubàlongolola.

³¹ “Yèyè wàkalwa kùdi Bèndè, Bèndè kabààkaMwakidila to.” Wàkambila bayiidi Bèndè ne: “Kanùyì kùdi bàà Bisàmbà byà bendè to, kàdi ndaayi ànu kùdi mìkòòkò mijimìnè yà Izàlèlèlà. Nènku, panùyaaya, ewu udi unwàkidila mmungààkidile Mémè. Panùdi nubwela mu cimenga, kabàyi banwàkidile to, nutuutule lupwishi lwà mu makàsà ènù nùkwatè njila nùye. Nènku mu bulelèlèlè Ndi nnwambila ne, nebiikale mwà kutàmba kutwàla Sodoma ne Gomola mu ditùkù dyà Cilumbulwidi kupita mwikalabo mwà kutwàla cimenga aci.” Ne eci cyònsò cyà ku bimenga cyàkabenga bantu abo aci cidi mu butù leelù ewu. Eci cyònsò cyàkabààkidila, cìcidi kacya cìimana bu mùdi mikete. Ncyà bushùwà, nwamònu’s. Byàngata ntàntà mule bwà kwandamuna; kàdi Nzambi ùtu wàndamuna, kùtácishi

meeji to. Ncilu kubanga aci to, cyanàànà ncyàkufika kudilenga Bwàkabuulwibwà to. Kaa!

Kaa, ndi muswè kuMumòna, ntàngila mpàla
Wendè,
Bwà kwimbamù bwà kashidi bwà ngàsà Wendè
udi usùngila;
Mu mìsèèsù yà Butùmbi mbandishè díyì
dyànyì;
Pààpìta ntàtu yònsò, ndekeelu wa byònsò
kumbèlu, bwà kusànka kashidi.

³² Ntu munange aci. Twìnyikàayi mitù yètù bwà katanci kakesè cyanàànà. Nudikù baswè kwimana kuulu kumpàlà kwà kucyènza anyì? Ndi—ndi ngeela meeji. . . Bible mmwambe ne: “Paùdì wimana kuulu, usambila, ufwe luse.” Mbanganyi bàdì ne dilòmba didìbo baswè ànu kumanyisha ku dyela dyà cyanza kuulu? Vùlukàayi ne, Nzambi ùdì ùcimòna, Yéyè mmumanyè byònsò pa bwalu abu.

³³ Taatù wetù wa mu Dyulu, nyèwù tuseemena pabwìpì ne Cijila Cyèbè cyà Bunzambi mu Dìna dyà Mukalenge Yesù, Dìna didì dikumbànyìne mu byònsò adi dyàkafidiibwa mwab’ewu munkaci mwà bantu, bwà ne nànsha mèkù mu Dyulu ne pa buloba mminyika ne “Yesù.”

³⁴ Nènku tudi tulòmba, Mukalenge, bwà Wèwè kwakidila disàkidila dyètù. Dyàmbedi, bwà kubanga, bwà cidimu cidì munkaci mwà kufwà eci. . . bu mutùdì tujikijangana naaci dilòlò edi mu masangisha, tujikijangana naaci mu kufila butùmbi, mu kulonga Dìyì Dyèbè ne mu dimanya cidì EMU MÙDÌ MUKALENGÈ WÀMBA cyumvwija. Mbintu búngìpu kaayi bitùdì mwà kufùnda pa dibèji bwà kusàkidila’s wè! Mapanduka à tupàndukila mu mitanta mikesè, mibùlàkane atùdì bapete cidimu eci, mwaba ùvwa Sàtaanà mufwànyine kwikala mujikije mwoyi wètù, kàdi Kwèna mwanji kujikija neetù to. Pa nàнку tucìdì ànu twenda tutùngunuka. Tudi twitabuujà, Mukalenge ne, tudi ànu balediibwe ne bakolèshiiibwe mu buloba emu bwà kukupà luumù ne kukutùmbisha Wèwè.

³⁵ Nènku tudi tulòmba, Taatù, bwà Wèwè kutùfwila luse ku matomboka ónsò ne cilema cyònsò citùdì benze mu lwendu lwètù lwònsò. Enzaku bwà tupwe bilema byètù mwoyi dilòlò edi patùdì tubitonda apa, tubijiika mu Mbù wa Cipwàmwòyì, mu Dìna dyà Mukalenge Yesù, bwà kabìyì mwà kujuudiibwa cyàkàbìdì to; kàdi mpindyewu tukolesha batàngile ku cimanyinu eci, kùdì Muntu mupwàngàne awu, Kilistò Yesù. Enzàku nàнку dilòlò edi, Taatù.

³⁶ Pààkula basadidi Bèèbè, yònsò wa kùdìbo, swàku Ubàlaabe maanyì ne Nyumà wa Mwoyi, nènku swàku bwà bayiishe mutùbo kacya kabàyìku banji kuyiisha, ne bàtwale mayiisha mu èkèleeziyà dilòlò edi.

37 Nèнку tуди badisangishe apa mwinshì mwà musàkà mukesè ewu, utùdì ne kusàkidila bwàwù ewu, Mukalenge. Tуди ne kusàkidila bwà kwikala ne kapyà kîmpè kwà twètù kusòmbela, bwà musàkà pamutù pàà mutù wètù, s'ki cyònsò citùdi naaci dijinga.

38 Bwalu mabanji ètù kaèna mu ebu buloba to, àdi mu buloba bùcilwalwà. Nzambi, tуди tuàtèèka kuulu kwaka mwaba utùdì twitabuuja ne biivi kabèèna mwà kubwela ne kwiba to, ne dimomà kadyèna mwà kuànyanga to, bwalu mabanji ètù m'Mwoyi wà Cyendèlèlèlè. Nèнку tуди tulòmba, Taatù, bwà Watùlekelaku tusànka ne bwalu abu matùkù ónsò à mwoyi wètù.

39 Tuvwije basadidi bakùmbànyine. Umusha bubì bwònsò mu twètù, Mukalenge, byònsò byà kale abi. Kubitèèka . . . Swàku bwà miji yònsò yà budìmù ne bululu bwònsò bùumushiibwe mu myoyi yètù, bwà twamòna mwà kudipwekesha ne kalolo kumpàla Kwèbè. Enzàku nàнку, Mukalenge. Tupèèsheku cidimu citàmbe bunène citùtù kacya katùyìku bânji kupeta to, cidimu cilwalwà eci. Enzàku nàнку. Tùpèèshèku mpindyewu, dilòòlò edi, Díyì Dyèbè patùdi bindile mayiisha Èbè apa. Mu Dìna dyà Yesù mmutùdì tulòmba emu. Amen. Swàyai nusómbe.

40 Mpindyewu, mbyenze bu binkolèle bwà kumòna díbà dyà ku cimanu didi lwà kwàka, ne ncyèna muswè kulama bânà bèètù bashààle bindile to, nàнку nènteetè bwà kulwijakaja ne lubilu lukolè ne mwànyì mwònsò bwà kujikija citùpà eci. Nèнку, pàmwàpa, twètù katùyì bajikije to, díbà adi mààlabà mu dìndà netùteetè pàmwàpa bwà kutùngunuka, bu Mukalenge mwà kwanyisha. Ne pashìishe pìikalà Mwanèètù Neville kàyì mulwe to, anyì ní ncinyì cyònsò, èè, díbà adi nènteetè, bu Mukalenge mwà kwanyisha, bwà kwikala kaaba aka bwà kutùngunuka ne mudimu wà kàlaasà kàà Dyàlumingu.

41 Mpindyewu, kanùpu mwoyi mpindyewu to:

Sambilaayi, sambilaayi, mùshindù
wùmwèpelè
. . . wà kufika mu myaba mitùmbùke;
Sambilaayi, sambilaayi, disambila dyà
diitabuuja
Neditùùlule mabènesha à Nzambi.

42 Ki mùshindù wùmwèpelè wùdiku mwà kucyènza. Tùwìmbàayi pàmwè. Cidimu Cipyacipyà eci mpindyewu, tуди ne díbà dyàbùngì.

Tùsambilàayi, sambilaayi, mùshindù
wùmwèpelè
Wà kufika mu myaba mitùmbùke;
Sambilaayi, sambilaayi, disambila dyà
diitabuuja
Neditùùlulè mabènesha à Nzambi.

43 Nènku pìkala disambila dyà diitabuuja ditùulula mabènesha à Nzambi, tutungunukàayi ne kusambila. Ndi ne disànkà dyàbùngì, dilòòlò edi, tudi ne mpàlà mipyamìpyà mu Bukalenge bwà Nzambi yìvwà kàyiymu mu cidimu cishààle eci to. Nènku ndi, ànu ntungunuka ne kusambila bwà bàbùngì menemene bàsàkidiibwa dîbà dyònsò. Kàdi nànsha cyàbìbìdì cyà biikalaku mu luseke lukwàbò abi kí ncyanjiku kulondiibwa to.

44 Mpindyewu, netùbuululè ku nshapìtà mwi4 wa Bwàkabuulwibwà. Kùdikù muntu dijinga ne Bible anyi? Tudi ne ndambù wa Bibles kaaba aka pawikala muswè kutùlonda. Èyo, umwe wa ku baawisiyè àbande kuneeku mpindyewu, tudi ànu ne mushikì mujimà wà Bibles kaaba aka. Umwe wa ku balubuludi, baawisiyè, anyi cikampànda, àbande kuneeku buludi. Mwanèètù Zabel; muntu mukwàbò alwe, kàbìdì. Nwènù baswè ànu kwangata nseke yònsò yìbìdì, nènku netùpweke buludi ne kajila. Ne muntu yònsò udi muswè Bible, bwà kulonda pàmwè neetù, mòna's, pwekàayi ànu naayi ne nuyipèeshè muntu yònsò udi naayi dijinga awu.

Nènku tudi baswè bwà nùbuululè mpindyewu mu Bwàkabuulwibwà, nshapìtà mwi4.

45 Nènku, mpindyewu, pawikala musòmbele paanyimà kàdi muswè kutentemuka kulwa kumpàla eku, tudi ne nyaba yàbùngì dilòòlò edi bwà nwènù kubàndila kuneeku. Nènku nudyumwwe bancyankàme, nènku tubwelàayi buludi mu dìleesònà ne nùcibalèku pàmwè naanyi, ne tucìlonge patùdì badìsangishe apa. Kùdi nkwasà lwà kuneeku. Ndi mmòna babàka bàbìdì balwa. Nènku nkwasà yìbìdì's nyòyi eyi kaaba aka mene. Umwe nyewù bwà muntu udi nkaayendè apa ewu. Nènku ànu lwà paanyimà apa, kùdi ànu nkwasà mwab'ewu. Ndi ncinka ne bipeepudi bìdì ànu byela lupeepa myaba yònsò.

46 Nènku mpindyewu, mbanganyì bàvwà basànke ne dìleesònà ditùdì tufùma ku dilonga, dìleesònà dyà matùkù mwandamukùlù pa *Bikondo Mwandamutekète Byà Èkèleeziyà?* Twasàkidiilaayi. Bidi byènza ne ndyumvwè bîmpè, bwalu ndi mupetèlekù bulelèlà dibènesha dinène mèmè mwinè.

47 Mpindyewu, dilòòlò edi ne nshapìtà mwi4, tudi tushiya mpindyewu, Yone wàkaakula ne Cikondo cyà Èkèleeziyà wa Laòdikiyà. Nènku, mu Cikondo eci cyà Èkèleeziyà wa Laòdikiyà, cìvwa ncikondo cyà èkèleeziyà cyà citàmbe cibwejàkàji ku byònsò abi.

48 Nènku tudi tusangana cintu cyà citàmba kwenza luse mu citùpà cyà ndekeelu cyà Cikondo cyà Èkèleeziyà wa Laòdikiyà, Yesù mwimàne pambèlù pàà èkèleeziyà Wendè Sungasunga mùvwàYe mwipàcìbwe, ùkookola ku ciibi, ùteeta bwà kwalukilamù. Aci kí mmpèkàatù anyi? Ngeela meeji ne aci's cidi bu ùmwè wà ku Mifundu yà yitàmba kwenza luse untuku

kacya ngaabala. Yesù, pambèlù pàà ciibi Cyèndè Sungasunga, ne èkèleeziyà Wendè muMwele pambèlù, kàdi Úvwa uteeta bwà kwalukilamù ànu bwà kubàsungila. “Muntu yònsò wakàngula, uNdekela ngàalukila mu nzùbu Wanyì Sungasunga, Nèndyè nendè pàmwè cyàkudyà cyà dilòòlò ne yèyè pàmwè Naanyi.” Aci kí...aci kí ncyà cyenza luse anyi? Nzambi wa mu Dyulu, mwela pambèlù pàà èkèleeziyà Wendè Sungasunga, kùdì twitabàayi yàbò ne màngumba ne mùshindù wùvwàbò bènza awu. Mubeele pambèlù...baMwele pambèlù pàà èkèleeziyà, biitabe twitabàayi yàbò.

⁴⁹ Cìdì ànu ncintu cimwècimwè mwàkadibi mu ditùkù dyàkapoopediibwa Yesù pa nkùruse. Nènku aci's mpààkiitabàbò Baalàbààsè, mushipyanganyi, kàdi kupoopelabò Yesù ku nkùruse. Kulekelelabò mushipyanganyi munkaci mwàbò, uvwa mujaadikiibwe ne “mmushipyanganyi,” ne kwitaba... ne kubèngabo Yesù Kilistò, Umwèpelè uvwa mwà kubàpèèsha Mwoyi awu.

⁵⁰ Nènku s'ki cintu cimwècimwè cìdì naaci dingumbà dyònsò, ne dingumba dyà beena Mpenta, leelù ewu. Bàdi bamòna ne màngumba awu àfwafwa buludi ànu pàdiwu adyenza dingumba apu. Kakùtukù kwanji kwikala nànsha dimwè (mu—mu mikàndà yà maalu-malonda) dituku kacya didìvwije dingumba kàdi dyenzeku kacya cintu kampànda pa kuumusha kufwà buludi. Bimanyinu byònsò, maalu à kukema, ne mapà kubùmukabi, ne bikwàbò byònsò, pàvwabo ànu ne baadìvwiji dingumba. Nènku pamutù pàà kwitaba Mukalenge Yesù bwà kubàpèèsha Mwoyi, bàakalukila buludi ne kulekelela Baalàbààsè munkaci mwàbò cyàkàbìdì. Aci kí ncintu kampànda cyà cyenza bwòwà anyi? Kabyèna bikèmesha to pàvwà Nzambi mwela pambèlù pàà èkèleeziyà Wendè, ne mwimàne, ùkookola, cikondo cyà ndekeelu cyà èkèleeziyà, ùteeta bwà kwalukilamù.

⁵¹ Mpindyewu, tudi tujandula ne Bwàkabuulwibwà mbutèeka mu bitùpà bisàtù. Cyà kumpàla n'nshapità yisàtù yà kumpàla ayi, mmitàngile maalu à Èkèleeziyà, Mukenji awu, mwanjèlò... mutùmina banjèlò bàà Èkèleeziyà. Nènku kuumukila... Nènku pashìshe Yèyè ùdi ùmuka mu cyàlu ànu mu nshapità mwi3, kèna ùmwènèka kàbìdì to too ne ku nshapità wa 19, mu nshapità wa 19 ùdi wàlukila. Pankaci pàà cikondo eci, Nzambi ùdi ùkwàta mudimu ne beena Yudà. Pashìshe, kubangila ànu apu, cìdì pankaci pàà dilwa dyà cimenga cinènè cyà Yelusàlèrà, ne di—ditwibwà dyà citampì dyà cisàmbà cyà Izalèlèrà, ne bikwàbò, ku cikondo cyà nshìikidilu.

⁵² Mpindyewu, ki bwà cinyi dilòòlò edi tudi tushiya... Dyàkamwè paanyimà pàà eci nùnkù, Yone wàkamòna... Mu cisanga cyà Paatèmò... Mbanganyi bàdi bavùlùke bule bwà ntàntà bùvwa Paatèmò usanganyibwa ne... kule ne mwelelu wà màyi? Mbule kaayi buvwaye ùsanganyibwa? Kilòmèetà mitwe ku makumi anaayi ne mwandamukùlù, ncyà bushùwà,

kule ne ku mwelelu wà mbú. Nènkú nyungulukilu wà Paatèmò ùvwa bule kaayi? Nudi bavùluke àmwè àà ku maalu àà buloba anyi? Kìlòmèètà mitwè ku makumi àbìdì ne yìnaayi yà nyungulukilu wendè. Kàdì cìvwa cyangaciibwa bu mwaba wà diipacila beena Loomò, kwelamù beena búlokò. Nènkú Yone ùvwa mwela muntwamu bwà cinyi? Ùvwakù mwenze cinyi? Ùvwa—ùvwa mwibe cintu kampànda anyi? To. Ùvwa . . . Bààkamwela muntwamu bwalu ùvwa ùtácisha bantu ne . . . anyi wènzà cintu kampànda cibì anyi? To. Yèyè ùvwa kuntwaku bwà cinyi? Bwà Dìyì dyà Nzambì ne bujaadiki bwèndè, bwà kuyiisha Èvànjeeliyò.

⁵³ Kàdì cintu kampànda cidìku mwà kwenzekela mwena Kìlistò kaciyì bwà bwìmpè anyi? To, to, to. Nànkú cìvwa Nzambì mumupàtwile pambèlù apu nkaayendè mu cisanga amu ncinyi? Bwà kutùpèèsha Mukàndà wà Bwàkabuulwibwà ewu. Nwamònu's, Nzambì ùdì ànu mwà kukùtakaja dyabùlù dìbà kàna dyònsò dìdìYe muswè adi. Kì mmwòmò anyi? Yèyè Ùdì ànu mwà kwenza nànkú cyanààna. Ndi ànu muMunange. Bwalu, kabyèna bikèngela bwà mèmè kwikala ne meeji matwè to, nwamònu's. Mpindyewu, bu ne mvwa ne meeji matwè, ndi mufwànyine kuteeta kuàpwa ònsò mwoyi bwalu ncyèna mumanye muntu nànsha umwe uvwa mwà kwikala ne meeji matwè bu Yèyè to. Nànkú ndi—ndi ànu . . . Cyònsò cìndi naaci, ndi ndìlekelela kùdìYe ne ngenza ànu cidìYe wàmba bwà kwenza. Kwàjiki. Mìngà misangu mbibèngangane ne mùshindù ùntù ngeela meeji ne ki wòwù. Kàdì ndi mumanye ne, Yèyè ùcilombola, Yèyè ngudi ne meeji matwè. Yèyè mmumanye cidìYe wènzà, mèmè to. Pa nànkú ndi ànu mmulekela Yèyè ùcyènza, nudi numòna's, dìbà adi cidì ànu . . . cidì mu cyòci. Nwamònu anyi? Pa nànkú ndi mMulekela ànu ùcyènza. Ki cyòci aci, Mwanèètù Neville. Èyowà's, mukalenge, Mulekèle àcyènzè ànu cyanààna. Nwamònu anyi? Yèyè ki Udi mumanye cidìYe wènzà, mèmè to. Nwamònu anyi? Pa nànkú ncyèna ànu nteeta kwediibwa bilòngò binène ne bikwàbò to. Kàdì ndi ànu ndipwekesha mèmè mwinè, ngàmba ne: "Kì mèmè ewu, Taatù, dìbà kàna dyònsò dy'Ùdì naanyi dijinga adi." Nànkú ntùngunuka ànu ne kuya mùshindù awu ne cìtu misangu yònsò cyenzeka mu cyòci.

⁵⁴ Pa nànkú, Yone, katùvwa kwikala bapetè Mukàndà wà Bwàkabuulwibwà ewu—ewu bu kabùyì bwà Yone nànsha, ne bu Yone kàyì mupatuke muye mu cisanga amu to. Acì's ki cìvwa njila wa Nzambì bwà kutùpèèsha Mukàndà wà Bwàkabuulwibwà. Ùvwa kuntwaku, ngeela meeji, bidimu bitwè ku bisàtù, ne mu Mukàndà . . . kufùnda Mukàndà wà Bwàkabuulwibwà.

⁵⁵ Mpindyewu, dìbà adi tudi bamushiye ku dibìikila dyà ndekeelu, dyà mvnsà wa 22 wa nshapìtà mwi3: "Ewu udi ne maci, ùmvwe cidì Nyumà wàmabila maèkéleeziyà."

56 Mpindyewu, kubangila ku nshapità mwi4:

Paanyimà pàà cyôci eci mêmè kutàngila, ne, mònaayi, ciibi cyunzulula mu dyulu: ne dîyi dyà kumpàla dingàakuumwa divwa dyenze bu ne divwa. . . mpungi wàkulangana naanyi; divwa dyamba ne: Banda kuulu kuneeku, nènku nènkuleeje maalu àdì ne cyà kwikalaku pashùshe.

57 NetùCyangate ku mvensà ku mvensà. Nènku ndi ne Mifundu búngì cyanààna mifunda kaaba aka, mukàndà mujimà wàyì, kàdì ncyèna mumanye ne ntoo ne penyì pangàáfika naaCi. Mukalenge àtùlombòleku. Mpindyewu, tàngilàayi, Dìyi didi ne:

Paanyimà pàà maalu aa (paanyimà pàà cikondo cyà Èkèleeziyà) . . .

58 Ne cyònsò eci kuumukila ànu mwab'ewu, mpindyewu, necítangile, necyènzeke pa buloba paanyimà pà Dyambwibwa dyà Èkèleeziyà. Nwamònu's, paanyimà pàà Dyambwibwa. Eci necìpinganè mpindyewu bwà kwambula Izàlèèlà. Paanyimà pàà cikondo cyà Èkèleeziyà, paanyimà pàà bikondo byà Èkèleeziyà, ne bwòbò. . . Èkèleeziyà kí mmumwenekeku kàbìdì to too ne ku Bwàkabuulwibwà nshapità wa 19 pàdiYe walukila ne Mubàki Wendè. Nzambì àtumble bwà Didyà dyà dibanji!

59 Twänjàayi kubala aci. Nudikù baswè kubala Mifundu eyi patùdì tuyìbala apa anyì? Èyo. Tùbuululàayaaku mu Bwàkabuulwibwà 19. Èyo, mukalenge, Bwàkabuulwibwà 19. Tùbangilàayi ku mvensà wa 7, Bwàkabuulwibwà 19. Eci mpàdì Èkèleeziyà ùmwènèka cyàkàbìdì, kavwaku mumwènèke kàbìdì to too ne mu nshapità wa 19.

Tùsankàayi ne tucyonkomokàayi, ne tùmupàayi luumù: bwalu dibàkà dyà Mwàna wa mùkòòkò dyàkulwa, ne mukàjèndè ùkaadi mumane kudìlongolola.

60 Kaa, ndi—ndi mwà kuyiisha pa bwalu abu too ne mundankùlù kàdì nciyi ngàmba cyàbìbìdì byàci to. Tàngilàayi ne: “Mukàjèndè mumanè kuDìlongolola.”

61 Charlie, Nellie, ne nwènù bwònsò, ànu citùvwà twamba aci, kuntwaku, ne Rodney, ditùkù adi. Nwamònu anyì? Paakakùpà Eliyà cilàmbà aci pa Elishà. . . Anyì pààkacitèèka Eliyà pa Elisha; wàkoolola cyanza ne kucyàngatulula kàbìdì, kucilwátaye ne kwasa naaci lwendu too ne mwàkasabukàye naaci Yadène, ne kuyaye pa mukùnà ne kubàndayè mu ditempu, kucìmacishaye.

62 Pàdi mwena Kilistò musùngìdìbwe dyàmbedi, mpàla wendè ùdi utàngila kùdì Kilistò, dífà adi ùdi ne cintu cyà kwenza yèye mwine. Cintu cìdì cilonda, bìdì bikèngela bwà yèye kudìjidila ku bibidilu byònsò bikooyike: “kutèeka ku luseke bujitu bwònsò, kuDìlongolola. Mukàji-musèla mmuDìlongòlòle!”

63 Cidi cìmvùlwija kaabwalu kakesè, ndi ànu ne cyà kukaàmba kumpàla kwà twètù kutungunuka. Lwà ku Wesètè eku, kukaadi cikodo kampànda, bidimu byàbûngi, kùvwa Kumpànyì munène wa Armour ne Swift Packing. Cìvwàbo benza ncinyi's, bàvwa bàlwa kuntwaku bwà kusumba ngombe ne kusumba maferme. Nènku bàdi ne mfranga bûngi cyanààna, ne basumba fermes mikesè yònsò, ne bapeta mìliyò yà hectares yà ferme mùshindù awu, bàlaminamù bisumbu ne bisumbu binène, bilenga byà ngombe byà Hereford abi. Yàbò bôbò. . . Biikale ne yàbò njila yà njanja sungasunga ne bikwàbò yìdì yìtwàla ngombe ayi ku cikùmbi ne ku cikwàbò.

64 Nènku Armour ne Swift ùvwa ne cipaapu cinène cyà ferme, kàdi dîngà ditùkù baakapetamù mutàngidi wa midimu, mulombodi wa byònsò, muvwàbi, wa ferme awu, yèyè awu ùvwa ne nsongàakàji bu yìnaayi anyi yìtaanu. Nènku kujandulabo ne umwe wa ku bàna bààbò ne Armour munène awu ùvwa. . . anyi, kî mbàna bààbò to, kàdi umwe wa bàna bènda balela ne, ùvwa ne cyà kuya kwendakana mu ferme. Kàdi yèyè awu ùvwa—ùvwa nsongàalùme, muntu mujike. Nènku nsongàakàji yònsò yìvwa mitwishùbwe ne yìvwa mwà kuseeswisha nsongàalùme ewu ànu ne—ne cifiikidi cyèndè. Nànku ki bwònsò kudilongolobò ne kulongololabò byònsò bwà dilwa dyèndè.

65 Pàakafikaye kuntwaku, bàvwa ne cyà kumwakidila ne kulongolola ditùkù dyà mwakidilu, bavwàle tuunkanzu twàbò tukesè atu, twikale ne màlendà eku ne eku, ne tungoma twà tutùpà twà 44 tupayika ku mikàbà, ne bifulu bikokela paanyimà pàà mitù, nudi bamanye's. Nènku bàvwa mwà kwikala beena ku wesètè ànu bèètù bàà ciibidilu abu, ne yònsò wa ku nsongàakàji eyi ùvwa ne cyà kupeta. . . Umwe wa kùdibo ùvwa ne cyà kubakula nsongàalùme ewu.

66 Nènku bàvwa ne—ne kànà kàà tatwàbò mukwàbò kuntwaku keena tatwàkù uvwa mufwè ne mamwàkù mufwè. Yèyè awu ùvwa mwànà wa bakàji wa tatwàbò mukwàbò, nènku ùvwa ànu bu mupika menemene kùdì bwònsò bàvwa kuntwaku abo. Ne midimu yònsò yà bukooya, bivwa bikèngela bwà yèyè kuyèna, kusukula malongu ne bintu byònsò. Kàdi kàvwa ne bilàmbà to, bìmukèngela kuvwàlaye bilàmbà byà nkòmbù ne. . .

67 Nànku pàakakùmbana dîbà dîvwà nsongàalùme ne cyà kufika, bwòbò bwònsò kubwela mu matempu ààbò ne, ki bwòbò bàyaaya abo, batàngile ku ngàlà bwà kumwakidila. Nènku bàvwa batuuta bingoma, ne tubalu tutwa kumpàla twalukila tukungwila mu mawùlù, ne bikwàbò byònsò. Ne kuyabo nendè ku ferme aku. Kàdi dilòlò adi bàvwa ne difesto dinène. Ki kupàtukabo kuntwaku kuya ku bitèèkedi byà byàkudyà ne ku myelelu yà lupangu aku, ne bôbò—bôbò kwimba ne kujabo maja, dilòlò dijimà adi. Yèyè ùvwa kuntwaku bwà matùkù àbìdì anyi àsàtù.

68 Kânà kàà tatwàbò mukwàbò aku. . . Mpindyewu, ndi muswè kufwànyikija eci ne cintu kampànda mpindyewu. Bàna bàà tatwètù mukwàbò bàdi bavwàle cileya, ne èkèleeziyà mîmpè myasa tuleyi tunène, ne yimweka bu ne kwòkò kwikale dîna dyà bukooya bikèngela kudipa beena mpenta, cintu kampànda cyà cibì. Bàdi pààbò benza cintu cibì, kàdi kanwàkuumvwaku bàcîteeya to, nudi numòna's. Bòbò mbàà milongo yà kuulu, nàнку bàdi. . . kanwàkuumvwaku bàtèèla bwàbù bwalu to. Kàdi mwambi kampànda wa cyena Mpenta enzebi cilema musangu ànu ùmwè, dîbà adi, mukwètù, ncikwambìdi, nebàbùtampàkàje ditùnga dijimà mu cikàndàkàndà cyònsò. Èyowà, mukalenge. Mwanèètù kampànda wa cyena mpenta àdìdìnge asambidile mwànà kampànda, kàdi mwànà awu àfwe, cibejibeji cyònsò mu ditùnga aci necibusambulujè ne: "Dyondopa dyà kùdi Nzambi's Ndikolesha dyà maalu."

69 Èè, dîbà adi mbwà cinyi kubenga kufùnda mu cibejibeji bwalu bwònsò bùdi bangàngàbukà bapangila? "Bipata nshimbà mbala kuseki, lubilu ndwà bukwànyama." Nwamònu anyi? Pa nàнку, bu bwòbò mwà kwenza nàнку, kí mbafwànyine kupeta mwaba mukùmbane mu milongo yà bibèjibeji abi wà kufùnda bafwè bwònsò abu. Mémè mwà kuya mu nkità emu ne kwamba ne: "Muntu yònsò udi mufwile ku dyondopa dyà kùdi Nzambi abiikè," ne pashìishe kwamba ne: "Muntu yònsò udi mufwile ku byanza byà ba mingàngà àjuuke," mbafwànyine kupita abu ku búngì mùllyò mujimà ku umwe. Ne aci's ncilelèlè menemene. Nàнку bwòbò ne cyà kudyula ewu, badyule kàbìdi mukwàbò. Nàнку's ncyà bushùwà. Kàdi bàdi bashipa miliyò ne miliyò ku cidimu ne manga ne dipandangana, ne kanwàkuumvwakù bàbutèèja to. Nudi numòna's?

70 Pa nàнку, kaansongààkàjì kakesè aku, kàvwa ne midimu yònsò mikolè ayi yà dyenza. Nàнку dîbà adi, dyàkamwè, nsongààlùme. . . dilòòlò kampànda didyà dyà dilòòlò dimane kujika ne bamane kuja maja, ne yònsò wa ku nsongààkàjì eyi ùvwa mudilengeje ne èyo, nudi bamanyè's. Kàdi nsongààkàjì mukesè ewu ùvwa mwenzejiibwe bwà kulwàta nkanzu mukesè, wa kale musùnsùke. Kàdi dilòòlò kampànda ùvwa musòmbe mu nzùbu wa cidiilu paanyimà pàà didyà dyà dilòòlò dimane kujika, nènku ùkaavwa musikùle màlòngù ne mupàtùke pambèlu bwà kwimansha màyi à nsangidilu awu kumfundu aku. Yèyè. . . mmwenze ànu unyunguluka ku cimanu cyà lupangu aku, ki mwabilaayi ewu mwimàne, mweyèmene ku cimanu cyà lupangu aku. Yèyè ne: "Wetwàwu."

71 Nsongààkàjì ne bundu bwà kacya, bwalu awu's ùvwa mwànà wa balùme wa mutàngidi mukùlù wa bintu, mwànà wa mwena ferme awu. Kupwekeshaye cyesu aci panshi, bwà kíkadi wàlwa kumumòna mùshindù ùvwaye musùnsùke awu to; kubangaye wènda ùpingana cyànyimà, ku makàsà kutupù, wènda ùtàngila panyimà, nùнку ewu.

72 Ki nsongààlùme kwasayè lwendu mutàngile kuvwaye aku, kwambayè ne: “Kùciinyi to.” Yèyè ne: “Ndi muswè kukwambila cintu kampànda.” Yèyè ne: “Ndi mulwe mwab’ewu bwà kiipacila kampànda, ndi mulwè kukèba mukàji wa kusela.” Ki yèyè ne: “Ndi mukèbangane nendè myaba yònsò.” Yèyè ne: “Ncivwa muswè kusela nànsha umwe wa ku bânà bàà bakàji bàà mu cimenga abu to, ndi muswè kupeta cìmvwà ngeela meeji ne ki mukàji wa bushùwà.” Ki yèyè ne: “Ku bwònsò bankaadiku mumòne, ndi munkaci mwà dikutwishila wèwè mèsù mwaba ewu. Nènku ndi mujandwile kùdì bàmwè bantu ne udi mwànà wa mwanààbò ne mutàngidi.”

Yèyè ne: “Ncyà bushùwà, mukalenge.”

73 Yèyè ne: “Ndi muswè nkulòmbeku cintu kampànda. Udikù mwà kwitaba bwà nkusèlè anyi?” Mòna’s, kàvwa mumanyè cikwàbò cyà dyenza to. Ûvwa ne bundù bwà dikèma, kàvwa—kàvwa mumanyè mwà kwandamuna mulùme awu to.

74 Kaa, ndi ànu ncinka bwà mùshindù wàkadyùmvwàye. Kì mmwòmò? Pàmvwà mèmè ewu, musangu kampànda ngènzàmpèkààtù, nciyi pabwàsà, mwànà wa kanwàyi, Yesù Kilistò kwamba ne: “Ndi muswè bwà wèwè wikale Wanyi.” Mmuniyì mùvwàYe mufwànyine kulwa kùdì muntu bu mèmè ewu? Mmuniyì mùvwàYe mufwànyine kwamba ne: “Nènkupèèshè dikù mu Dyulu”? Mmuniyì muvwàYe mwà kwamba ne: “Nènkusùngile”? Mukèngeledi wa luse bu mèmè ewu, mmuniyì mùvwabi mwà kwikala? Kàdi Yèyè wàkacyenza’s!

75 Yèyè ne: “Mukalenge, ndi—ncyèna—ndi—ncyèna mukùmbànyine to. Ncyèna mufwànyine kwikala mukàji wa muntu bu wèwè to,” yèyè ne, “bwalu wèwè utu mwibidile ne bintu binène. Kàdi mèmè ewu ncitu mumanyemu kantu nànsha kàmwè to, ndi mupele.”

Yèyè ne: “Kàdi wèwè ki disungula dyànyì.”

76 Kàdi kabìvwaku bilenga pàakakwambila Yesù ne...? Wakamanya ne kùvwa mukùmbànyine bwà kwikala mwena Kilistò to. Wèwè, kakùvwa cintu nànsha cimwè cyùvwà mufwànyine kwenza to, kàdi Yèyè...Ki ncintu nànsha cimwè...Yèyè—Yèyè wàkakusungula ànu cyaanàà. Wamònu anyi? Yèyè...Cintu’s mbwîmpè Bwèndè, luse Lwèndè pàakakusungulàYe. Kì ngwèwè wàkaMusungula to, udi mumanyè’s, Yèyè ngwakakusungula. Ncyà bushùwà.

Yèyè ne: “Ncyèna—ncyèna...” Yèyè ne...

77 “Kutàngidi ku bilàmbà byèbè to. Mèmè ncyèna ntàngila ku bilàmbà byèbè to, ndi ntàngila cyùdì wèwè aci.” Yèyè ne: “Udikù mwà kwitaba bwà nkusèlè anyi?” Ne ndekeelu wa byònsò bààkiitabangana. Ki yèyè ne: “Mu cidimu cìmwè kuumukila ku ditùkù edi, nempingane. Wèwè dilongolole. Wìkalè muvwale cilàmbà cyà dibàkà, bwalu nempingane bwà kukusèlèla ànu mwab’ewu. Nènku nénye neebè ku Chicago, ku cibeeba cyà

Outer Drive, kwôkò aku nkuwikala ne nzùbu wa bukalenge wà wêwè kusòmbelamù. Nànkù disukwilangana dyònsò dyà malòngù edi nedijike, ne bikwàbò, dībà adi.”

⁷⁸ Pààkuumvwa bânà bààbò bàà bakàjì, anyì bânà bàà tatwëndè mukwàbò bwalu abu, kwambabo ne: “Wêwè kapèlè, kantu cyanààna, kaacinyonga kakùtàkane aka! Mòna’s, udi kamanye bîmpè ne muntu awu kàvwa ne awu meeji to!”

⁷⁹ Kàdi kî ng’aci cidìbo ànu bàmba leelù ewu menemene anyì? “Mmunyì mùdì musùmbà wà bansantu babùnguluki bàà mu malaba, musùmbà wà bantu bàdì kabàyi nànsha mwà kufùnda dīnà dyàbò diinè, mmumnyì mùdìbo bafwànyine kwikala Èkèleeziyà? Mmunyì mùdì musùmbà bu awu mufwànyine kwikala nànkù?” Kàdi’s aci cidì ànu cyà bushùwà. Patùdì tupangadika ne tumvwa ditwà dyà mishikù yà dipangadika dyà dibàkà yà Yesù Kilistò pa mwoyi wètù bwà kuumusha mpèkaatù, Cintu kampàndà cidì citwàmbila ne Yèyè neàpinganè cyàkàbìdì, cyà bushùwà menemene ànu mùdì buloba amu. Dīngà ditùkù Yèyè neàpinganè.

⁸⁰ Wàkakwàta mudimu cidimu cijimà aci, bu mupika, ulaminyina tumeeyà makumi mwandamutekète ne tutaanu twà bicyele atu, tùvwàbo—tùvwàbo bàmufuta bwà mudimu wèndè wà ku ditùkù ne ditùkù atu. Nènku ùvwa ùlaminyina tukuta twèndè bwà kusùmbàye nkanzu wa dibàkà, bwà kulongolola kantu ne kantu. Kaa, ki cyònsò civwaye naaci mu meeji èndè, kudilongolola. (Nènku ùvwa . . . “Yèyè mmuDilongolole.”) Ùvwa ne bilàmbà byèndè, bilàmbà byèndè byà dibàkà, pàvwà bânà bàà tatwëndè mukwàbò bàmwèsekà ne bàmwèlulwila apu.

⁸¹ Ndekeelu wa byònsò kufikabi ku . . . ndekeelu wa byònsò ditùkù dyena diinà. Kudìvwadikaye cilàmbà cyèndè cyà dibàkà aci (Kaa!), yèyè yònsò mudilongòlòle ne mukezùke. Ki bânà bàà tatwëndè mukwàbò bakesè abo kulwa kumwela mu cijèngu bàmba ne: “Èè, ka wêwè kantanyi kakùtàkàne wè. Mòna’s, udi mumanyè ne kî ncivwaye naaci mu meeji to. Yèyè kàvwa mufwànyine kwakula ne . . . kusela nsongààkàjì bu wêwè to.” Kàdi, yèyè wàkadilongolola, nànsha bishi.

⁸² Ki kwenzekabi ku shòò ku ìbaamulòòlò, kàdi kubangabo kumuseka ne kumwelulwila. Kwimanayè ànu lwà ku ciibi aku, mwindile, nànsha bishi. Ki yèyè . . . yèyè ne: “Ndìbà kaayi divwaye mwambe ne neikale mwab’ewu?”

⁸³ Yèyè ne: “Bwà dībà kàvwa mwambe to.” Kàdi yèyè ne: “Wàkamba . . . wàkangambila dilòòlò dyàkanselaye . . . anyì dyàkangelaye kakanù kàà dibangilangana adi. Wàkamba, wàkangambila ne: ‘Bìvwà ne cyà kwikala bu mu cidimu cìmwè kubangila ànu ku mpindyewu.’ Ki bwà cinyì kunshàadile dībà ànu òmwè.” Amen, mutùngunuke ànu ne kwindila. “Nkunshàadile dībà òmwè, nkushààle tusunsa makumi

àsàtu, nkushààle tusunsa dikumi.” Kàdi ki kumusekabò ne kumwelulwila, ne kumwinyikabò mènà ònsò.

⁸⁴ Kàdi, ndekeelu wa byònsò, ànu pa dîbà mene dyà bwalu kashondo adi, kumvwabo mùvwa lusenga lunyunguluka ludila mu nkatà ya matempu, tubalu twènda túlwa. Cìvwa mwà kwikala cintu cyà mùshindù kaayi bwà kumòna mukàjì-musèla mukesè awu uvwa mudìlongòlòle awu, udyela pambèlù pàà ciibi apu, ne upatukila lwà mu tukanu tujingila kùdì bilòngò byà rose amu, bwà kudyela mu mabòkò à mulùme uvwaye munange awu, bwà kwikalaye bàyendè, bwà kumwambulaye mùshindù awu, ne kusediibwa ne kuyabò babànde pa tubalu.

⁸⁵ Dimwè dyà ku matùkù aa, mwanèètù, aba bàdì bèlulwila bàmba ne “munsantu mubùnguluki wa mu malaba,” ne—ne “beena mpenta,” ne bintu byà mùshindù awu. . . Tudi bindìle, tucidi ànu ne ndambù wa dîbà mukesè. Bàdì bàmba ne: “Aa, kakwèna dishìlangana ne bivwaku kwònsò eku nànsha.” Kuditacishi to, kucidi kutùshààdile ndambù wa dîbà mukesè. Ne mu cikondo cyàkalayàYe aci, Yèyè neikale mwab’ewu. Ne dimwè dyà ku matùkù aa netùbuuke e kuya. Dilongòlòle wèwè ànu! Ikàlà muvwàle Cilàmbà cyà Dibàkà! Patula lwonji lwònsò mu mwoyi wèbè. Bintu byònsò bìdì. . .

⁸⁶ Tèelejààyi mùdì Mufùndù ewu ùbadiibwa kaaba aka:

Tùsankààyi ne tucyonkomokààyi, ne tùmupààyi luumù, bwalu dibàkà dya Mwànà wa mùkòòkò dyàkulwa, ne mukàjèndè ukaadi mudìlongòlòle. (Nwacyùmvù anyi?)

Ne bàakamupà bwà kuwàlayè cilàmbà cyà linà mufinùnùke, cikezùke ne citòòke, bwalu linà mufinùnùke mbwakane bwà bansantu. (Butùmbi kùdì Nzambì!)

Ne kungambilaye mèmè ne: Fùnda ne: Babènèshùbwe ng’aba bàdì babùkidùbwe ku didyà dyà dibanji dyà dibàkà dyà Mwànà wa mùkòòkò. Ké kungambilaye ne: Aa mmèyi malelèlà à Nzambì.

⁸⁷ Nànku nekwikale didisangisha mu kapeepà dimwè dyà ku matùkù aa, mu kalolo aku, mu kalolo mu citùpa cikesè emu. Uh-huh. Shààla wèwè ànu mudìlongòlòle! Ikàlà mudìlongòlòle wèwè mwinè! Pàtulà mu mwoyi wèbè meeji mabì wònsò. Itàbùùjà Nzambì, nànsha kumweka mifitù yà bìshi ne nànsha baseka bishi ne beelulwila bàmba ne: “Udi mutùpàkàne.” Tungunuka wèwè ànu ne kwikala ne nsòmbelu wa cijila ne kwikala ne mwoyi bwà Nzambì. Tùngunuka ànu ne kwenda kuya, dîbà nedilwe!

⁸⁸ Pa nànku, nudi numòna’s, Yèyè ùdi ùmwènèka cyàkàbìdì mpindyewu mu Bwàkabuulwibwà 19:

Paanyimà pàà maalu aa... (Paanyimà pàà yêyè mumanè kumòna cikondo cyà Èkèleeziyà.)

Paanyimà pàà maalu aa mèmè kutàngila, ne, mònaayi, ciibi... .

⁸⁹ Mpindyewu, vùlukàayi, Yone ùcidi ànu mu Paatèmò. Nènku paanyimà pàà yêyè mumanè kumòna bikondo byònsò byà èkèleeziyà bijike:

...Mèmè kutàngila, ne, mònaayi, ciibi cìvwa cyunzulula mu dyulu:...

⁹⁰ “Ciibi.” Ciibi ncinyi? Bwàkabuulwibwà 3:8. Mu Bwàkabuulwibwà, nshapità mwi³ ne mvensà wa 8: “Ndi mumanyè byenzedi byèbè. Mòna, Ndi mutèèke kumpàla kwèbè aku Ciibi cyunzulula cidi muntu nànsha umwe kàyì mwà kukanga, kàyì mwà kukanga ne muntu nànsha umwe kàyì mwà kunzulula to.” Yêyè ki Ciibi! Ciibi! Kilistò ki Ciibi. Wàkamba, mu Yone Munsantu 10 ne: “Mèmè ki Ciibi cyà ku cikùmbi cyà mìkòòkò.”

⁹¹ Nènku mu matùnga à kale amu, nudi nusangana ne mulami wa mìkòòkò ngudi ubweeja mìkòòkò yèndè mu cikùmbi. Paanyimà ùdi ùyibala ne ùmòna ne yònsò mmibwele, pashìishe yêyè ùdi ùdyàdija ànu mu ciibi amu. Mubwàbwà kawèna mwà kubwelamù kawùyi mumubiishe yêyè to, anyi mìkòòkò yèndè kayèna mwà kupàtuka kayìyi mimusambukè nànsha. Kaa, mmùshindù mwinè ùdi mìkòòkò yidyumvwa mu dikùbiibwa’s wè bwalu mulami wa mìkòòkò mmulaale mu ciibi.

⁹² Noà, mu Dipungila Dikùlukulu, wàkiimana mu ciibi cyà bwàtù. Kaa, tèèlejàayi; ndi njinga kwamba cintu kampànda! Wàkiimana mu ciibi ne kuyiisha bantu bàvwa bàmuseka abu kanyinganyinga ne bwakàne. Nènku ànu mu ciibi cìmwècìmwè mwàkiimanaye amu, muntu nànsha umwe kàvwa mwà kubwela mu bwatu amu kakùyi ku ciibi cìmwèpelè aci to. Cìvwa ànu ciibi cìmwè aci ku bwatù abu.

⁹³ Ne kùdi Njila ànu wùmwèpelè! Èyo, Mwanèètù. . . ? . . . Kùdi Njila ànu wùmwèpelè wùdi wùbweja mu Mubidi wà Kilistò. Kùdi Ciibi ànu cìmwèpelè ku Èkèleeziyà wa Nzambì udi ne mwoyi, ne Yesù ke Ciibi aci! “Mèmè ndi Ciibi! Mèmè ki Njila, njila udi ulombola ku Ciibi aci awu. Mèmè ki Ciibi cyà cikùmbi cyà mìkòòkò.”

⁹⁴ Wàkambila cikondo cyà èkèleeziyà eci ne: “Ndi mutèèke kumpàla kwèbè Ciibi cyunzulula.” Wàkambila cikondo cyà èkèleeziyà wa ba-Méthodiste aci, bóbò kuCìkoma nyimà, kuditwà mu bulongolodi. “Kàdi Ndi mutèèke kumpàla kwèbè ciibi cyunzulula.” Mpindyewu, paanyimà pàà bamanè kupeta dijidiibwa, Yêyè wàkamba ne: “Mèmè nènseekè Ciibi cyunzulula,” mbwena kwamba ne Nyumà Mwîmpè. “Ku Nyumà umwe nkutùdi bwònsò” (munyi?) “babàtìijìbwe mu Mubidi wùmwè wùdi Kilistò.” Yêyè wàkatèèka mukenji awu kumpàla

kwà èkèleeziyà wa ba-Méthodiste kàdi bwòbò kuCisesukabò. Bààkalwa too ne ku dijidiibwa kàdi kubèngabò Nyumà Mwímpè. Nudi nuvùluka aci anyi? “Ciibi cyunzulula aci.”

⁹⁵ Mmunyi mùdi ubwela mu Kilistò? Ku Nyumà umwe, Nyumà Mwímpè, udi mwikàle Nyumà wa Kilistò. Tudi babwelèmù, kî nku dilabulangana dyà ku cyanza, kî nku dimyaminangana dyà mâyi pa mutù to, kàdi ku dibàtiiza dyà Nyumà Mwímpè umwèpelè nkutùdi bwónsò babàtiijilbwe mu Mubidi wùmwe ne bavwiijilbwe baabanyanganyi bàà Mubidi awu. Dibàtiiza dyà Nyumà Mwímpè dimwè mu Ciibi aci.

⁹⁶ Ciibi eci cyàkatèèkiibwa mu Dyulu, Ciibi aci, pààkatàngilàyè muulu wàkamòna Mukalenge Yesù. Tàngilàayi ànu citùpà cyàci cidi cilonda aci. Ciibi aci, Mukalenge Yesù.

.. Mémè kutangila, ne, mònaayi, ciibi civwa cyunzulula mu dyulu: ne diyì dyà kumpàla... dngàakuumvwa divwa... diyì dyà mpungi...

⁹⁷ Mpindyewu ngonyoonyi yàndàmunyi myaadi. Yone ùvwa munkaci mwà kutàngila Paatèmò, nènku mpindyewu nyèwù ùbàndisha mèsù muulu. Bwà cinyi? Yèyè udi umòna cintu kampànda cyènzeka pa buloba apa (bikondo byà èkèleeziyà ebi), mu Bikondo Mwandamutekète byà Èkèleeziyà amu, ne pashiishe paanyimà pàà mumane kujikija kumòna bikondo byà èkèleeziyà, paanyimà pàà cyòci aci, paanyimà pàà bikondo byà èkèleeziyà bimanè kujika, kuumvwaye Dìyi. Kàdi kubandishaye mèsù mutàngile mu Dyulu ne kumònaye Ciibi cyunzulula, ne Dìyi dyà kumpàla kudiladi bu mpungi. Èyo, myanda kushintuluka kuumukila ku Paatèmò too ne ku Dyulu.

⁹⁸ Dìyi divwa Dìyi dimwèdimwè dyàkendelà mu bitèekedi byà myèndù byà ngòlò mwandamutekète abi; Dìyi dimwèdimwè adi, Dìyi kadivwa dishintùlùke to. Kàdi, Dìyi, Divwa penyì pààkaDyùmvwàye musangu wà kumpàla apu? Mbanganyi bàdi bavùlùke, mu cikondo cyà kumpàla cyà èkèleeziyà? Paanyimà pèndè. “Mvwa mu Nyumà mu ditùkù dyà Mukalenge,” Bwàkabuulwibwà 1–1:10. Pa nàнку yèyè... “Mu Nyumà.” Panwikala baswè kufùnda aci mmu Bwàkabuulwibwà 1:10 ne 13 ne: “Mvwa mu Nyumà mu ditùkù dyà Mukalenge, ne mémè kuumvwa paanyimà pàanyi bu Dìyi dyà mpungi ne kudiladi bu cyòna cyà mâyi àbùngi. Nènku pangàakakudimuka bwà kutàngila, ngàakamòna Muntu mwimane munkaci mwà bitèekedi byà myèndù byà ngòlò mwandamutekète.”

⁹⁹ Mpindyewu, paanyimà pàà Yèyè mumanè kumuleeja bwalu busokoka bwónsò bwà bitèekedi byà myèndù byà ngòlò mwandamutekète abu (mwikàle mukwàte mitootò mwandamutekète, ne kafulu kàà nsukì katòòke ku mutù, ne bikwàbò, ne makàsà bu cyamù cyà kabanda, ne mèsù bu kapyà, bimfwanyi), pashiishe kuumvwaye Dìyi dimwèdimwè adi (Tàngilàayi.) dyàkwila mu Dyulu. Ki kutàngilayè muulu e

kumònaye Ciibi cyunzulula. Kaa! Ciibi cyunzulula mu Dyulu! Mmunyi munùdi nubwelamù? Ku Kilistò Yesù, Ciibi cìmwepèlè aci, Njila umwepèlè, kakwèna mûngà njila nànsha.

¹⁰⁰ “Muntu kàna yònsò udi ubàndila ku mûngà njila, ùdi mùmwè ne mwivì ne munyèngi.” Ne mu lusùmwinu lwà ewu wakabwelamù ne wàkasanganyiibwa ku Didya dya Dibanji kàyi cilàmbà pambidi awu, wàkasanganyiibwa mupiile, ne muswikiibwe ne mwedibwe mu mîdimà yà pambèlù. Njila ànu Umwèpèlè, wa dilwa ku Didya dya Dibanji. Ngeela meeji mwua muiishe pa bwalu ebu kî nkwanji kwenza ntàntà mule to. Dìbà dyònsò didì mubàki. . . Pàdi muntu upeta. . . uselangana mu matunga à kale, bivwa bikèngela bwà kwabanyaye mabiikila yèyè mwinè, bivwa bikèngela bwà yèyè kufila mizàbì yèyè mwinè. Pa nàнку pàakatwilanganàye ne muntu ewu, wa bwalu musòmbe ne ku mèèsà à didya dya dilòlò. . . Mbanganyi bàdi bavùlùke lusumwinu alu? Bushùwà, nwènù batù babala Bible abu. Nènku kusanganaye muntu kampànda ku mèèsà à didya dya dilòlò adi kàyi cilàmbà cyà dibàkà pambidi to.

¹⁰¹ Ncinyi aci? Mubàki mwimanè ku ciibi ne bwònsò babwelekù ne dibìikila. “Muntu nànsha umwe kèna mwà kulwa kùdi Taatù kàyi mupicile kùNdì to. Bwònsò bàdi Taatù muMpèeshe, anyì mubiikile, nebàlwe kùNdì.” Ki bòbò bàlwalwà abu, bafila dibìikila dyàbò, kùdi mubàki awu, bwà ne bantu bwònsò bìikale bafwànangane. Ki cintu cìmwè cìdi citàngile ntèndeleeleu mwimpè, wa nkulunkulu, wa Nyumà Mwimpè, ùdi ubavwija bwònsò bafwànàngàne. Nànsha bwòbò babanji anyì bapele, bapika anyì badiikadile, bafìike anyì batòoke, balùme anyì bakàji, bàdi bwònsò umwe mu Kilistò Yesù. Ne mubàki ùvwa wimana ku ciibi bwà kwakidila dibìikila adi, ùvwadika mukwètù awu mùzàbì, bwà babanji ne bapèlè bìikale bafwànangane. Ki mùshindù awu ùdìbi mu Bukalenge bwà Nzambì, kamwèna baakampànda bàà banène ne tuukampànda twà tukesè to; bwònsò bàdi muntu umwèpèlè, bwònsò umwe mu Kilistò.

¹⁰² Mpindyewu, nudi nwela meeji bìshi pààlwà Mubàki ne kusangana muntu musòmbe mwaba awu kàyi Cilàmbà cyà Dibàkà pambidi? Yèyè ne: “Mulundà wanyi, mmunyi mùdi mwà kwikala mubwele kaaba aka?” Kàdi kushààlaye matàma bu byàtá, byàkaleeja ne ùvwa mubwelèle mu njila mukwàbò kakùyì ku Ciibi to. Mmubwelèle ku dididiishi, mmubwelèle ku ciibi cyà ku mfundu. Kàdi kumubiikilaYe ne mulunda, bileeja ne ùvwa cidimba cyà èkèleeziyà: “Mulunda wanyi, mmunyi mùdi mubwele mwab’ewu kùyì cilàmbà pambidi?” Mpindyewu, Yesù ngudi mwambe eci, Yèyè mwine. Ne kubiikilaYe mwimanyi wa ku Ciibi, kwambaYe ne: “Muswikè, makàsà ne byanza.” Nènku wàkeediibwa mu mîdima yà pambèlu pìikala myadi, ditwa dya mikemu, ne disùmakaja dya mènù. Ki Mèyi à Kilistò Sungasunga, (Cyà bushùwà.) “Yèyè wàkeediibwa pambèlù.”

Bwalu, mbijaadikiibwe ne, kàyi Cilàmbà cyà Dibàkà to, ùvwa mubwelele mu njila mukwàbò pa kuumusha ku Ciibi. Bu yêye mwà kwikala mulwile ku Ciibi, nùнку’s mmupetè Cilàmbà cyà Dibàkà.

¹⁰³ Kaa, tèelejàayi eci! Dìbà adi piikalabi ne Cilàmbà cyà Dibàkà n’dibàtiiza dyà Nyumà Mwîmpè, mmunyi mutwàleejiibwa mu mùshindù mukwàbò? Piikalabi ne cikondo cyà èkèleeziyà cyà kumpàla civwa ne cyà kulwila ku Ciibi, Kilistò Yesù, kubatiijiibwa mu Dìnà dyà Yesù Kilistò, kupeta dibatiiza dyà Nyumà Mwîmpè, bwà kuvwàla Cilàmbà cyà Dibàkà, mmunyi mutwàlwila mu njila mukwàbò? Wèwè mulwilè ku ba-Méthodistes, ku ba-Baptistes, anyi ku beena Mpenta, anyi dingumba kàna dyònsò dikwàbò adi, newùswikiibwe ne wèdiibwè mu mîdimà yà pambèlù. Bìkèngela ùlwile kùdi Kilistò Yesù, Njila, Ciibi, Bulelèlà, Mwoyi. Amen!

¹⁰⁴ Èyo, Dìyi òmwèdìmwè adi, Bwàkabuulwibwà 21, anyi, Bwàkabuulwibwà 1:10 ne 13. Nènku ndi muswè bwà nwènu kumòna ne, Dìyi dyàkuumvwaye dyàkula nendè òvwa dijìkuke bu mpungi. S’nudi bamanyè mùtù mpungi udila, utù ùfila mwadi mutwè ngwengwengwe. Mpungi ùdi umvwija cinyi mu Bible? Mvità. Dìbà kanà dyònsò dyùdi umòna mpungi ùdila, mu mvità. . . mu cikondo cyà Bible, mwadi wèndè ùvwa ùmvwija mvità, anyi dibuulula anyi cintu kampànda cidi ne cyà kwenzeka.

¹⁰⁵ Mpindyewu, yêyè. . . Paanyimà pàà bikondo byà èkèleeziyà bimanè kujika, ne bintu byònsò bilongolola, bilongolola bwà cyàlu cyà nshapìt mwi4 ewu, bikondo byà èkèleeziyà bikaavwa bijikè. Yêyè ùkaavwa mushiyàngàne ne buloba, nudi numòna’s. Vùlukàayi ne, Dìyi dyàkaakulà nendè adi, paanyimà pèndè, mu bitèekedi byà myèndù byà ngòlò mwandamutekète, mudimu ùkaavwa mumanè kujika. Nènku mpindyewu Dìyi òmwèdìmwè adi òvwa dyàkwila mu Dyulu. Civwa ncinyi? Yêyè ukaavwa mumanè kupikula cisàmbà Cyèndè. Mudimu Wèndè wa pa buloba wùvwa mùjikè, ne Yêyè ùvwa mu Butùmbi, ùbiikila Yone ne: “Bandila kùneeku!” Uh-hum. Amen! Aci cidi cingumvwija mwà kwela mbilà mu mulàadilu wà Cidimu Cipyacìpyà emu. Kaa, ekèlekèle! Ki bwalu mbwòbù abu’s. Nwamònu’s, mudilongolola: “Bàndila kùneeku!”

¹⁰⁶ Mvità! Eci ndibanga dyà mvità minène; bantu bàakabènga Mukenji wà Nzambi, bàakabènga Nyumà Mwîmpè, Mùsànjeelà wa maèkèleeziyà mwandamutekète. Ewu wàkabenga Mukenji wà ngàsà Wèndè ewu kî nkumushàadile cingà cintu to, ànu cilumbulwidi civwà pabwipi, byònsò pàvwàYe ùdilongolola bwà kwicikija makenga pa buloba mpindyewu. “Bandila kùneeku nènku Nénkuleeje cidi cilongolola bwà kwenzeka. Bangènzàmpèkààtù babèngi bàà Kilistò, babule Nzambi, Nèngiicikije cijji Cyànyi cicolè pambidi pàabò.”

107 Tàngilàayi mùdi bwalu. Kaa, bu mutùdi tulonga mu maadilòòlò aa nenùtambe kucyùmvwà ne nenùtambe kucyùmvwà díbà dyònsò. Katwèna mwà kupeta bintu byònsò ànu emu to, tudi ne cyà kutungunuka ne kutapa dísù eku ne eku. Mùshindù wikalaci cintu cyà cyènza bwòwà bwà bòbù abu pààdila mpungi wa ndekeelu, ne pààlwanganyibwa mvità yà ndekeelu, pààyiishiibwa diyishiya dyà ndekeelu, pìmbabo musambu wà ndekeelu, nènku tudi twimàna ku Nkwasa wa Cilumbulwidi wa Kilstò. Nebàkwebeje ne: “Bwà cinyi kwàkaWùpeta? Wakenza cinyi ne Mwoyi ungàakakupèesha?” Nebàkulòmbe bwà wèwè kufila kabingilà. Ncinyi díbà adi?

108 Nutù banguumvwè ngimba musambu awu, anyi nguteeta ne:

Ncinyi díbà adi? Ncinyi díbà adi?
Pààbuuludiibwà Mukàndà munène awu,
bwalu nebwikalè cinyi díbà adi?
Pìikala aba bàdi babenga Mukenji
Mwà kukonkiibwàbo bwà kufila kabingilà—
Bwalu nebwikalè cinyi díbà adi?

109 Nenwìmane kuntwaku, ànu menemene bu mùdi Mukàndà ewu mufùndiibwe emu. Newikale. . .Newimane kuntwaku ne bàkukonke kabingila. Kaa, cìdi ne difutu kutùdi, mwanèètù wanyi wa balùme, mwanèètù wa bakàji, mbujitu butwimikila, bu bânà bàà balùme ne bàà bakàji bàà Nzambì, bwà twètù kudikenketa díbà dyònsò dyà ditùkù. Pòlò wàkamba ne: “Ndi mfwa ku ditùkù ne ku ditùkù. Kàdi ndi ne mwoyi, kì mmèmè to, kàdi Kilstò ngudi ne mwoyi munda mwànyi.” Nwamònu anyi? Dikenkèta, bwalu kwena mumanyè ne ndíbà kaayi diwàbìikidiibwa bwà kwandamuna Kuulu kwaka to.

110 Mpindyewu: “Wakumvwà Díyi dyà mpungi.” Èyo. Mònaayi, mònaayi cyàkamba Yone, wàkamba apa, mu citupà cyà ndekeelu cyà nshapità wa 1 ewu ne:

*...dyàmbedi díyi...dìvwa...bu mpungi dìvwà
dyàkula naanyi; ne dyamba ne: Bandila kùneeku,...*

Bandila kùneeku! Mwà munùleeje bikondo byà èkèleeziyà pa buloba; mpindyewu bandila *kùneeku*, nenkuleeje cintu kampànda cìdi cyènzeke kuulu eku.

111 Nwamònu’s, Kilstò ùkaavwa muumùke pa buloba díbà adi, Ùkaavwa mubànde mu Butùmbi, cikondo cyà ikèleeziyà cimane kujika, bileeja ne Nyumà Wendè ukaavwa mujikije apa. Nènku Yèyè ùkaavwa muyè mu Butùmbi ne ùvwa ùbìikila Yone bwà kubàndayè, ne Wàkamuleeja bikwàbò bìvwà ne cyà kwenzeka. “Bandila kùneeku.”

112 Mpindyewu, tudi tumòna Yone, nshapità mwi2...mvensà mwi2. Mònaayi, lùkàsàlùkàsà, Yone wàkasàkidila eci:

Nènku dyàkamwe... (Amen!)

113 Kaa, mémè ngenza maalu àmweka bu à lukutukutu, bìdi ne ndi ndyùmvwà ànu bîmpè be. Yone kusàkidilaye ne:

... dyàkàmwè mvwa nsanganyiibwa mu nyumà: . . .

114 Paùdi umvwa Dîyi dyà Nzambì dyàkula neebè, cintu kampànda cìdi cyènzeka. Amen! Kaa, cyàkakwenzekela mùshindù awu anyi? Cyàkangenzekela, kukaadi bidimu makumi àsàtù ne cimwè, ne kubangila ànu apu ncicyèna kàbìdi umweumwe awu to. Kaa, pàakambàYe ne: “Lwâyi kûNdi, nwênù bwónsò bàdi bàkwàta mudimu mukolè ne bambùle majitu makolè, Mémè nènnùpèeshè diikisha.” Kunshintululaci.

115 Yone wàkamba ne:

... dyàkàmwè mvwa mu nyumà: . . . (Nyumà kaayi? Nyumà Mwîmpè. Kaa!) . . . Mvwa mu nyumà: ne, mónaayi, nkwasà wa butùmbi ùvwa mutèèka mu dyulu, ne kampànda musòmbe pa nkwasà wa butùmbi awu.

116 Nwamònu’s, Yone ùkaavwa muùmùke pa buloba dîbà adi. Kilistò ùkaavwa mushiye buloba (mu mmwènekèlu wa Nyumà Mwîmpè) ne mwàlukile cyàkàbìdi ku Mubidi. Leelù ewu Mubidi awu mmusòmbe kuntwaku bu civùlukilu, bu mulàmbù. Tudi tukafika ku aci patùdi tulonga nshapìtà ewu. Kàdi Nyumà wa Kilistò wàkaalukila bwà kwikala ne mwoyi mu Èkèleeziyà, bwà kwikala ne mwoyi munda mwètù.

117 Mpindyewu, dyàkàmwè paanyimà pàà Yèyè mumanè kuleeja ndekeelu wa cikondo cyà mudimu Wèndè pànu apa, Wàkabànda mu Dyulu, Yèyè ne: “Nènkuleejè ciikalà mwà kwenzeka paanyimà pàà cyòci eci, paanyimà pàà bikondo byà èkèleeziyà.” Yèyè ne: “Yone, Ncyèna kàbìdi mwà kuyiikidila neebè panshi apu to, bwalu Nkaadi muùmùke panshi apu, Nkàadi mubànde kùnèèku. Banda Naanyi kùnèeku!” Amen! “Nènku Nenkuleejè ciikalà mwà kwenzeka paanyimà apa.” Kaa, ekèlekèle! Hmm! Kaa! Mwambwibwe mu cikèènà-kumòna, mwambwibwe mu Butùmbi.

118 Dilabula Dyèndè didi ne cyà kwikala cintu bu cyà Pòlò aci’s. Kolintò Mwibìdi 12:2 ne 4, panwikala nucifùnda. Kolintò Mwibìdi . . . 2 too ne ku 4. Pòlò wàkambwibwa dîngà ditùkù, mu . . . mu cikèènà-kumòna, yèyè pèndè. Nuvwakù bamanyi nànkù anyi? Ne wàkamòna bintu bivwà bîmpè bitàmbe bwà yèyè mene kubyàkula; bidimu dikumi ne binaayi, kàyiku mene mwà kubitèèla to. Nwamònu anyi? Kàdi tèèlejàayi dishiilangana pankaci pààbò.

119 Cyàkamòna Pòlò, bàakamukandika bwà kucyàkula anyi kucyèla patòoke ku bantu. Kaa, ekèlekèle! Ncyèna ngeela meeji ne ùvwa mwà kucyènta to. (Bwalu, kaalwendu kakesè kangàakenza dîngà ditùkù, bwenzeji bwàkù kî mbwanji kungumuka ne kabwàdyàkungumukakù to.) Nwamònu’s, yèyè—yèyè wàkamòna bintu bivwàye kàyi mwà kwamba to. Ngeela

meeji ne yêyè kàwva ne mēyi à . . . wàkambwibwa mu Dyulu diisâtù, nànsha nànkù. Nwamònu's, mu Dyulu diisâtù.

¹²⁰ Ndishìilangana kaayìpu pàakambwibwa Yone ne kumòna Yesù, yêyè ùwva . . . Yêyè ne: “Biwámònu abi bifunde mu mukàndà ne ùbyalùjè, ùbitùmine maèkèleeziyà.” Bàakakàndika Pòlò bwà kwakula, kàdi Yone yêyè bàakamulòmba bwà kubifùnda mu mukàndà bwà byàmòna mwà kupweka mu bikondo byònsò. Kaa, ekèlekèle! Mbibuulula patùdi twakula apa, bwà kubuuludiibwa mu matùkù à ndekeelu aa. Kabyàkabuuludiibwa mu matùkù èndè nànsha, mbibuulula mpindyewu mutùdi twenda tuya naabi emu.

¹²¹ Kaa, kàdi mònaayi, Yone, mwikale mwambwibwe dyàkàmwè paanyimà pàà cikondo cyà èkèleeziyà, ùwva cimfwànyì cyà Èkèleeziyà mwambwibwe. Dyàkàmwè paanyimà pàà cikondo cyà èkèleeziyà cimane kujika, Cikondo cyà Èkèleeziyà wa Laòdikiyà eci, dībà adi ki dīlwalwà Dyambwibwa. Èkèleeziyà ùdi ùbànda bu mwàkabànda Yone amu, mu Bwikadi bwà Nzambì. Kaa, ekèlekèle! Yoyòyò! Aci's cidi cinyukusha musùukà wànyì. Mwambwibwe, ku Dyambwibwa dyà Èkèleeziyà! Ki kwambaYè . . . Mwaba ewu, Mukàndà wa Bwàkabuulwibwà, mufùnda, nwamònu's, ku ndekeelu kwà cikondo cyà èkèleeziyà.

¹²² Mpindyewu, ndi ne kantu kampànda mwab'ewu kàndi muswè kutòokeshà bwà cintu kampànda cyà kale citù citàcishètàcìshe beena Kilistò bàabùngì ntàntà mule. Nènku mwva ndyàmbidila leelù ewu ne, pàmvwà ndonga, mfùnda Mifùndu, bwà kujandula mènà ne meekala mashìilèshìilàngàne ne bikwàbò. Netùbwelemu paanyimà pàà katanci kakesè, myanzankòngòlò ne bimfwànyì, ne bikwàbò. Mvwa munkaci mwà kufùnda Mifùndu eyi bwà ngaamòna mwà kuyitàngulula ne kutàpakù dīsù, bu mèmè . . . patùdi twenda tutùngunuka apa. Bwalu, pa ciibidilu, bu mèmè mwà kwakula pa cintu kampànda cyà mùshindù ewu, ndi mufwànyine . . . mbifwànyine kwikala bishìilàngàne, ndi mufwànyine kuteeta kucimanya ku mwoyi. Kàdi mùshindù ewu, paùdiku ànu ne ndambù mukèsè wa dībà, ndi njinga kutàpakù dīsù bwalu cidi cyenda mu Mifùndu mwònsò, mpàla ne nyimà.

¹²³ Mpindyewu, mu Maataàyì 16:13, tudi tusangana cyòci eci, panwikalà nufùnda Mifùndu. Maataàyì . . . Wèwè muswè kwalukila . . . wèwè muswè kutàngilaku, èyo, Maataàyì 16:13. Cidi . . . Kaa, netwàlukileku bwà kucìbala, nènku dībà adi netùcyumvwe bimpè menemene. Maataàyì nshapità wa 16, ku mvensà wa 13. Tèelejàayi ne ntèmà yònsò mpindyewu patùdi tubala 16:13 ne: “Pàakalwà Peetèlò . . .” Anyi:

Pàakalwa Yesù ku nseke ya ku Cesarée wa Philippe, wàkakonka bayiidi bèndè, wàmba ne: Bantu bàdi bàmba ne . . . Mèmè Mwànà wa muntu awu ndi nganyì?

Ki bôbò ne: Bàmwè bàdi bàmba ne . . . wêwè udi Yone Mubàtiji: bàmwè ne, Eliyà; ne bakwàbò ne, Yelèmiyà, ne, anyi umwe wa ku bapròfetà.

Yèyè kubàmbila ne: Kàdi nwènú nudi nwamba ne mêmè ndi nganyì?

Ki Simonà Peetèlò kwandamuna e kwambayè ne: Wêwè udi Kilistò, Mwànà wa Nzambì udi ne mwoyi.

Ki Yesu kwandamuna e kumwambila ne: Udi mubènéshùbwe, wêwè Simonà Bàà-yona: . . . mubidi ne mashi kî mbidi bikubuulwileci wêwè to, kàdi Taatù wanyì udi mu dyulu.

Ne ndi nkwambila . . . wêwè ne: Wêwè udi Peetèlò, ne pa lubwebwe elu Nèngùbakilèpu èkèleeziyà wanyì; ne biibi byà ifernò kabyàkumutamba bukolè to.

Nènku mpindyewu . . . Nènku nènkupèèshè nsapì yà bukalenge bwà dyulu: ne cyònsò ciwàswika pa buloba necìswikùbwe mu dyulu: . . . cyònsò ciwàsùululà pa buloba necìsùuludiibwe mu dyulu.

Pashùshe kukàndikaye bayiidi bèndè bwà kabùkadi mwà kwambila muntu nànsha umwe ne yèyè ùwà Yesù Kilistò awu to.

¹²⁴ Tèelejàayi ne ntèmà mpindyewu. Èyo. “Bwà ku dîbà adi kubanga . . . Kuumukila ànu ku dîbà adi kubangaYe . . .” Ndi muswè kwangata mukwàbò, nudi mwà kutungunuka ne kuwùbala, kwangata mvensà wa 28 ewu, bwalu nudi mwà kubala yònsò yìdi mishààle ayi panwàya ku mènù.

Bulelèlà—Bulelèlà Ndi nwwàmbila ne: Kùdi bàmwè biimàne kaaba aka, bìikalà kabàyi mwà kulabula lufù to, too ne pààmònabo Mwànà wa muntu ùlwa mu bukalenge bwèndè.

¹²⁵ Kaa, anjì elàayi bî meeji ku bwalu abu! “Bàmwè biimàne mwaba ewu, bàmwè biimàne mwaba ewu, kabààkulabulaku lufù to too ne pààmònabo Mwànà wa muntu ubwela mu Bukalenge Bwèndè.” Dìyì kaayi's wè! Mùshindù ùtù mudyùdi muswè kucibakula bwà kuleeja ànu mùshindù ùdiye cinyònga, nwamònu's. Mùshindù ùdiye muswè kukwàta ku aci, nènku cyènzeka kàdi kabàyi bàngulamù mpasu nànsha. Nwamònu anyi? Èyo.

¹²⁶ Paanyimà pàà ditonda dyà Peetèlò dyà lubwebwe, citùdi bamanyè ne ditonda dyèndè didi . . . Yèyè ùwà mwà kwibakila Èkèleeziyà Wendè pa lubwebwe lùmwlùmwe alu. Kí m'Peetèlò, mwikale kaa dibwe kakesè, mùdi Kàtòlikè kàà cyena Loomò kateeta kucyàmba amu to. Kàdi ditonda dyà Peetèlò dyà Dibүүлulà, kî Èkèleeziyà nyèyè awu. Nzambì neàCibuulule; kaciyì ditonda dyà muntu ewu to, bwalu paanyimà yèyè wàkatwà cimpingà. Kí nditonda dyà Yèyè mwikàle Mwànà wa

Nzambì to; bwalu bàvwa bamanyè ne Yèyè ùvwa Mwànà wa Nzambì, Peetèlò's wáfùmu ku dicyàmba. Kàdi civwaci, civwa, Dibuuulula dyàkabuuludiibwa kuumukila mu Dyulu ne Yèyè ùvwa Mwànà wa Nzambì adi. Yèyè ne: "Mubidi ne mashi kí mbìdì bikulongèsheci to, kàdi Taatù Wanyì udi mu Dyulu mmukubuulwileci. Nènku pa lubwebwe elu, lubwebwe lwà ditonda alu, Nèngiibakilèpu Èkèleeziyà Wanyì, ne biibi byà iferno kabyàkunyanga. . . kabyàkuMutàmba bukolè nànsha."

¹²⁷ Ndi ntèkemena ne katwèna tupicisha dībā bikolè menemene mpindyewu mwab'ewu to, bwà twàmòna mwà kubwela mu eci. Nènku tudi baswè kumòna mùdìci cipòngolokela mu muntu. Mbwalu bulonda bulenga mwab'ewu mene bu twètù ànu mwà kukùfika. Èyo. Èyowà, ditonda dyà lubwebwe, dyà ne Peetèlò ùvwa. . . Ùvwa mwà kwibakila Èkèleeziyà Wendè pa ditonda dyà Peetèlò. Yèyè ne: "Bàmwè bàdi biimàne mwab'ewu kabààkulabula lufù to too ne pààmònabo Mwànà wa—wa Nzambì ùlwa mu Bukalenge Bwèndè."

¹²⁸ Mpindyewu, vùlukàayi ne, Yèyè wàkaakula ne "bàmwè." Aci's civwa citàmbe ne umwe, kí mmwòmò anyi? Bàmwè s'mbifwànyine kwikala bààbúngì ne: "bapìte pa umwe." Kàdi mpindyewu tàngilàayi, bayiidi Bèndè bwònsò bàvwa biimàne mwaba awu, ne Yèyè ùvwa ùkonka yònsò wa kùdìbo ne: "Nudi nwela meeji kaayi bwà eci? Ne nudi nwela meeji kaayi bwà *cyàcyà*?" Kàdi Yèyè wàkamba ne: "Kùdi bàmwè bàà kunùdì biimàne mwab'ewu, bàmwè biimàne mwab'ewu, bìkàla kabàyi mwà kulabula lufù to too ne pààmònabo Mwànà wa muntu ùlwa mu Bukalenge Bwèndè." Kaa, ekèlekèlè! Dìyì kaayipu's wè! Elàayiibi meeji tǔng, dyàkambiibwa kukaadi bidimu binunu bìbìdì.

¹²⁹ Nedìikale. . . difwànyine. . . Dìyì dyà Nzambì ditukù dyà kadiyi dipangila anyi? Dìyì dyònsò dìdìYe wàmba nedyènzeke anyi?

¹³⁰ Mpindyewu, twètù baswè, tùbuululàayi dībā adi mu nshapità wa 17 wa Maatàayi ki udi ulonda awu. PààkangataYe. . . Matùkù makesè paanyimà pàa aci, Wàkangata Peetèlò, Yakòbò, ne Yone, kubànda naabo ku mukùnà, pa luseke, bwà kwikalabo bantèmù. Peetèlò, Yakòbò, ne Yone; kàdi bààkamòna Bukalenge bwà Nzambì búlwa mu bukolè, bààkamòna dilwa dyà Bukalenge bwà Nzambì bwambùlùdiibwe. Amen! Kaa, bààkatwàdiibwa mu dibandila dyà Bukalenge bwà Nzambì bwambùlùdiibwe mùdìBu búlwa, dibwela mu cyàlu dyà Bukalenge bwà bidimu cinunu. Kudyànjlilabo kumòna dyambuludiibwa.

¹³¹ Kùkaadi cikondo kampànda. . . musùmbà wa bambi, Oral Roberts ùvwa umwe wabò. Cecil B. DeMille, pààkafùndàye *Mikenji Dikumi* eyi, wàkabiikidisha Mwanèètù Shakarian, Mwanèètù Roberts, bayiishi bààbúngì mu ditùnga dijimà,

muyiishi kanà yònsò ewu ùvwa mwà kulwa, ne kubàbìikidisha bwà kubwelabo mu studio bangabanga ne mukàbà wà bindìdimbi awu kupàtudiibwawù, ne kubalekela bàdyànjila kuwùmòna bangabanga ne kuwùleejabo ku bantu bwònsò, pàvwàbo bafucisha ndola makumi àbìdi ne yitaanu ku ticket. Kàdi yèyè. . . Kumònabo dyambuludiibwa dyàwù, bwà bààmòna mwà kufila wabò mmwènenu bwà ne kùdiku mwà kwikala didyula kampànda pa bwalu abu anyi cìvwà cifwànyine kwambiibwa, ne bikwàbò. Bààkawùmòna kumpàla kwà bantu bwònsò kuwùmònabo.

¹³² Ki Yesù kwamba ne: “Bàmwè bàà kunùdi bàdi biimàne mwab’ewu” (Amen!) “kabààkulabula lufù to too ne pààmònabo Bukalenge bwà Nzambi bùlwa mu bukolè,” anyi ne: “kumòna Mwànà wa muntu ùlwa mu Bukalenge Bwèndè,” èyowà’s. “Kumòna Mwànà wa muntu ùlwa mu Bukalenge Bwèndè!” Ndambù wa matùkù paanyimà pàà cyòci aci, kwangataYe Peetèlò, Yakòbò, ne Yone, ne kubandabo kuulu kwà mukùnà, ne kwòkò aku Yèyè kushintuluka mpàla kumpàlà kwàbò. Dìbà, mu dibàlakana dyàdi, kadivwa difwànyine kwikala bu bilàmbà Byèndè bìvwaYe muvwàle to. Mmisangu búngì kaayi yitùdi bacilenge mu nsumwinu, netwende naaci mu Bible mujimà’s!

¹³³ Udi mwà kwangata cyena-bwalu cìmwè cyà mu Mifùndu ne kuswikakaja naaci Bible mujimà awu pàmwè. Èyowà’s, mukalenge. Mutanta nànsha wà mafi mwaba nànsha ùmwè! Cyònsò cilamika ne bukolè bwà Nzambi. Dyabùlù kavwakù mwà kudifindamu to nànsha bu yèyè ne cyà kudifindamu, Neyà bushùwà. Kèna mwà kubwela kùdi bantu bàà cijila abu bàdi bafile bujaadiki bwàbò kuntu kwàka ne biitabùuje Bukalenge bwà Nzambi, ne bangate Mufùndu ònsò ne baÙlamike ne bukolè bwà Nyumà Mwìmpè, kuÙsukula mu Mashi; bàà pa buloba kabèèna mwà kubwelamù to, dyabùlù kèna mwà kubwelamù to. Mbafwè, mwoyi wàbò mmusokoka mu Kilistò ku Cìtampi cyà Nzambi, ku Nyumà Mwìmpè. Mmunyi mùdi dyabùlù mwà kubàtácisha? Hmm! Ki bòbò abu, mu ngiikàdilù ewu mpindyewu.

¹³⁴ Lwà mu mwaba awu, dìbà adi, kumònaye Dilwa adi, anyi dyambuludiibwa. Nènku cyà kumpàla cìvwà cinyi, kumònabo. . .cintu cyàkamònaye? Cintu cyà kumpàla cyàkamònaye mu Dilwa adi cìvwà m’Mòsà, wakaleeja bansantu bafwè bàvwà ne cyà kubiishiibwa ku lufù. Eliyà ùvwa mwimane mwaba awu.

¹³⁵ Kaa, ndi muswe bwà numòne cìikalà mwà kwenzeka. Kùvwa Mòsà, dyàmbedi; aci’s mbikondo byònsò bisambòmbò ebi bìvwàbo balààle, bikondo bisambòmbò byà èkèleeziyà. Ki ng’ànù aci to, kàdi Eliyà ùvwamù; mùsànjeela wa ditùkù dyà ndekeelu, ne kasùmbù kèndè, kàà bashintùlùdiibwe, Bambwibwe. Amen! Mpindyewu mu cikondo cìlwàlwa; bindile Dilwa adi.

¹³⁶ Nènku ncinyi cidìbo bènza bwónsò...? Bwónsò bàvwa badisange Nendè. Kaa, ekèlekèle! Cìvwa ncinyi aci? Mulayi Wèndè kùdi Peetèlò, Yakòbò, ne Yone, kuulawù. Ncyà bushùwà. Bwalu Yèyè wàkamba ne: “Bàmwè bàdi biimane mwab’ewu kabààkulabula lufù to too ne pààmònabo Mwànà wa muntu ùlwa mu Bukalenge Bwèndè,” ne bààkamòna didyànjlila kuleejibwa dyàci. Pashiishe paanyimà pàà cyòci eci, paanyimà pàà dibìikà dyà ku lufù. . .

¹³⁷ Ndi muswè kunùtwàdila cikwàbò cintu; paanyimà pàà Yesù mumanè kufwà, mujiikìibwe, mu Yone Munsantu 21:20. Badyudi kampànda kutwàdijabò eci mu matùkù à mbangilu awu. Ànu patùcìdì mu dileesònà apa, twanji kucitòòkeshakù. Mu Yone Munsantu 20:21, Yesù wàkatwilangana ne bayiidi Bèndè, kubàdiisha ne mishipa ne dyàmpana pa kapyà. Nènku bu muvwàbo babànda ne mwelelu wà musùlù, Yone kuMweyemena mu cyàdi; ki Peetèlò kwelaye lukonko, wàmba ne: “Ncinyi cìikala mwà kwenzekela muntu ewu?” Yesù ùvwa munange Yone, Yone ùvwa muntu wa dinanga. Ne kwambaye ne: “Ncinyi cyènzekela muntu ewu? Ngiikàdilù wèndè neikale bishi? Matùkù èndè àcilwalwà neikale bishi?”

¹³⁸ Ki Yesù kubàambila ne: “Bwènù mbwèpi bu yèyè mwà kushààla too ne pàNgààlwà, too ne pàNgààlukilà? Ncinyi ciinè aci?”

¹³⁹ Nènku bayiidi bàakenza cilèmà, kwambabo ne “Yesù wàkamba ne—ne—ne ‘yèyè neàshààle ne mwoyi too ne ku Dilwa adi.”

¹⁴⁰ Kàdi Yesù kàvwa mwenze cilèmà nànsha cimwè to. Ànu kaaba aka mu Bwàkabuulwibwà, nshapità mwi4, Kilistò wàkalama Diyì Dyèndè! Wàkabandisha Yone mu Dyulu ne kwambulula cintu cijimà. Butùmbi’s wè! Yèyè—yèyè kumòna didyànjlila kuleeja. Wàkacimòna ànu byènzè bu ùvwa musòmbele pa buloba ne kumònaye bikondo byònsò nkòong byà èkèleeziyà mwàkenzekabi, ne ku dilwa dyà Mukalenge, Mukànda mujimà wà Bwàkabuulwibwà. Kaa, ekèlekèle!

¹⁴¹ Nudi numòna mùdi milayi Yèndè kayiyi yà yìpangila anyi? Mpindyewu, udi musungùdiibwe. . . Yakòbò bwà kwenza aci; Yone, yònsò wa ku bakwàbò abu; kàvwa mene mufwànyine kulekela bwà Pòlò kucimòna to, anyi kucyàmba, anyi cintu nànsha cimwè to.

Yèyè ne: “Bwènù mbwèpi bu yèyè mwà kushààla too ne pàNgààlwà?”

¹⁴² Nènku bu mùvwabi ne bàakamba nànku, Yèyè wàkasungula Yone ne kubànda nendè kuulu ne kumuleeja cintu cijimà kumpàla mene kwà kufwàye, byenze ànu bu ne wàkamòna cintu cijimà aci. Kumuleejaye cìvwaci ne cyà kwikala! (Mwanèètù Pat, aci kî ncilenga anyi?) Kaa, nwamònu’s, kumwambulaye buludi. Ànu apa mene, nshapità mwi4 ku mvensà mwi2,

ùdi ucijaadika. “Wākamuleeja bintu byākadiku, bidiku, ne byālwa.” Yèyè wākamuleeja cikondo cyà èkèleeziyà, dilwa dyà beena Yudà, dipòngolola dyà bipùpù, Dyambwibwa, Dilwa dyà cyākàbìdì, ne Bukalenge bwà bidimu cinunu, ne Cisòmbedi cyà Cyendèlèlè cyà Basungila Bèndè; byenze ànu bu ne ùvwa mupicile mu cintu cijimà aci, ne mucimòne cyenzeka cyònsò. Nwamònu anyi? Nwamònu anyi? Wākabànda nendè ne kumuleeja mu—mu—mukàbà ùvwaYe munkaci mwà kwenza, kumuleeja dyambuludiibwa dyà cintu cijimà. Kaa, ekèlekèlè!

¹⁴³ Mmwambwibwe. Muwùje mulayi Wèndè mu—mu Bwākabuulwibwà 4:2. Kumpàla kwà lufù lwèndè wākambwibwa mu Nyumà ne kumòna bintu byenze ànu bu ne mmubilenge ne byanza. Yèyè—yèyè wākacimòna cyònsò cyàmbuludiibwa. Ki kumònaye, mu cikèènà-kumòna, ànu menemene cìvwà cìfwànyine kwenzeka ne cyàkenzeka mene pa buloba kubangila ànu ku cikondo aci too ne ku dilwa dyà Mukalenge Yesù. Kumuleejaci mu cikèènà-kumòna.

¹⁴⁴ Ki pashìishe bayiidi. . . anyi muntu nànsha kàakambaku ne Yèyè ùvwa mwambe ne Yèyè nealwe cikondo aci to. Wākamba ne: “Bwènù mbwèpì bu, (mu ngaakwilu mukwàbò), bu yèyè mwà kushààla too ne paNgààlwà?” Pashìishe kumubandishaYe ne kumwambulwila ànu cintu aci ne kumuleeja cìvwà ne cyà kwenzeka. Kaa, ndi ànu munange aci. Hmm. Kaa, ekèlekèlè!

¹⁴⁵ Mònaayi mpindyewu, twanjaayi kumòna ne eci cìvwà cinyi:

*Ne dyàkàmwè mwà nsanganyibwa mu nyumà:
nènku, mònaayi, nkwasà wa butùmbi ùvwa mutèèka mu
dyulu, ne muntu musòmbepù, pa nkwasà wa butùmbi.*

¹⁴⁶ Kùvwa “Dìyì” dyākamubiikila. Kaa, Dìyì adi’s wè! Kaa, ncyèna mwà kulekela aci to, Dìyì adi dyà Kampànda awu paanyimà pèndè. Pashìishe kukenzakanaye mwaba awu, ne kumuleejaYe bikondo byònsò byà èkèleeziyà, bwalu ùvwa mwimàne mu bikondo byà èkèleeziyà, bitèèkedi byà myèndù byà ngòlò mwandamutekète. Pashìishe kumvwaye Dìyì paanyimà pàà bikondo byà èkèleeziyà bimane kujika; Dìyì kuumuka pa buloba, kubànda. PàākabwelaYe mu Butùmbi, wàkaMuumvwa wàmba ne: “Bandila kùneeku! Nènkuleejè cìikala mwà kwenzeka kubangila ànu ku mpindyewu.” Kaa, ekèlekèlè!

¹⁴⁷ Dìyì adi! Twakulààyiku bwà Dìyì adi mu kasunsa kàmwè; ndi ne yimwè Mifundu mifunda kaaba aka. Tuyaayi ku Tesalònìkà wa Kumpàla 4, nènku tèelejàayi ànu mwab’ewu cidì Dìyì edi ne cyàkwamba. Kaa, twètù bwònsò’s tudi bamanye cidìDi dijinga kwamba, kakùyì. . . kumpàla kwà twètù kucìbala, kì mmwòmò anyi? Tudi bamanye cìikalà mwà kwenzeka. “Mpungi wa Nzambì neàdile ne bafwè mu Kilistò nebàbiikè.” Ncyà bushùwà anyi? Wèwè udi ucifunda, mu Tesalònìkà wa

Kumpàla 4:16 ne 17: “Díyì,” Díyì adi òwà Díyì dyà Kilistò. Ncyà bushùwà anyi? Díyì dyà Kilistò!

Bwalu. . . mpungi wa Nzambi neàdile, ne bafwè mu Kilistò nebàbũke dyàmbedi:

. . . twètù bàdì ne mwoyi ne bashààle netwàmbwiiwbè muulu pàmwè naabò. . . bwà kutwìlangana ne Mukalenge mu mpeepèlè: ne kwìkala ne Mukalenge kashidi.

148 Díyì òwèdìmwè dyàkabiikila Yone ne: “Bànda,” adi Díyì òwèdìmwè dyàkambila Yone ne: “Bànda,” ndyòdì Díyì òwèdìmwè dyàbiikila Èkèleeziyà òngà ditùkù (Amen!), dibiiikila Èkèleeziyà.

149 Kàbìdì, Díyì òwèdìmwè dyàkabiikila Yone bwà kubànda adi, ndyòdì Díyì òwèdìmwè dyàkabiikila Lazàrò bwà kupàtuka mu lukitá, Díyì òwèdìmwè dyà mwarkanjèlò adi. Kilistò ki Díyì dyà mwarkanjèlò: “Díyì dyà mwarkanjèlò,” nwamònu’s. Kaa, Díyì dyà mpungi dyà Kilistò dyàkabiikila Yone bwà kubànda adi, n’Díyì òwèdìmwè dyàkabiikila Lazàrò. Nuvwaku bamòne ku lukita lwà Lazàrò, Yèyè wàkaakula ne Díyì dikolè. (Kabiyyi ànu wamba ne: “Lazàrò pàtukà,” to) “Lazàrò, pàtukà!” Dyàkamubiikila bwà kupatuka mu bafwe.

150 Ki kwandamunayè ne: “Ki mèmè ewu.” Nènku kupàtùkayè ku bafwè, paanyimà pàà yèyè mumanè kufwà ne mubìdì wèndè mubolè.

151 Díyì òwèdìmwè dyàkambila Yone ne: “Bàndilà kùneeku, Nènkuleeje bìmwè bintu bìdì pabwìpì ne kwenzeka.”

152 Díyì òwèdìmwè òkàla mwà kudila pààbiika bafwè mu Kilistò apu: “Bwalu mpungi. . .” Mpungi! Mpungi ncyini? Díyì dyà Kilistò, Dyòdì òwèdìmwè dyàkadila ne kumubiikila bwà kubàndayè adi. Wàkuumvwa Díyì bu mwadi wà mpungi dyàmba ne: “Bàndila kuulu eku!” Nudi numòna mwìkalà dibiiikà dyà ku lufù anyi? Nebiiikalè mu katanci, mu mubùnyì wà òsù. Díyì dyà òdila dijìkùke adi, nènku Yèyè neàbiikile Èkèleeziyà, dibiiikila ne: “Pàtukàayi muntwamu.” Díyì ònène òdì dibiiikila adi. Nzambi, nkwaçìsheku bwà kuDyumvwa ditùkù adi.

153 Ànu mùnkaadi mwambambe misangu yàbùngì. . . Ndi mumanyè, bu muntu wa cifwàkà, Rodney, ndi mumanyè ne kùdì ciibi cinène cifiike citèèka kumpàla kwànyì, cìbiikidiibwa ne lufù. Musangu wònsò wùdì mwoyi wànyì wùtuuta awu, ndi ntàmba kuseemena pabwìpì ne ciibi aci. Òmwè dyà ku matùkù nengiiikale ne cyà kubwelamù. Kàdì ncyèna muswè kubwelamù bu muntu mutulùmùke, ndilakana ne ngeela mbila to. Ndi muswè kubwelamù, mudijìngile mu mizàbì yà bwakàne Bwèndè, mumanyè eci: ne ndi muMumanyè mu bukòlè bwà dibiiikà Dyèndè dyà ku lufù; bwà ne òmwè ditùkù pààbiikilaYe, nempatuke munkaci mwà bafwè; pààmbiikilaYe bwà kumwènèka mu Dyulu, pàadila mpungi wa Nzambi

ne pààbiika bafwè mu Kilistò, mémè mwikale ne mwoyi, nêshintulukè mu katanci, mu mubunyi wà dîsù, ne nenye ne bàdi bashààle abu, muulu bwà kutuutakeena ne Mukalenge mu lupeepèlè. Dîyi dyà mpungi, mwadi mujikùke, mukolè. Hmm. Kaa, nebiikale byà mwomùmwè, byà mwomùmwè ne ku Dilwa Dyendè.

154 Kakwèna mwadi mulubidile pa Bwalu abu to. Kakùvwa cintu nànsha cimwè cilubidile kùdi Yone to pàakumvwàye Dîyi adi ne: “Bànda kùnu!” ki kubàndayè. Amen.

155 Pàvwa Lazàrô, mu bafwè, mu lukità; ne musùukà wèndè, mu lwendu lwà matùkù ànaayi mwaba kampànda, ncyèna mumanye kuvwawu to, ncyèna ngeela meeji ne muntu nànsha umwe wa kutùdi eku mmumanye to. Kwònsò kuvwawù aku, kabyàkashintulula cintu nànsha cimwè to. Wàkabiikiila ànu ne dîyi dîmwè kùdi muntu uvwa misàndà yà mu dikòbà munkacì mwà kudyà mubidi wèndè; ùnunka, mu lukità amu. Mpungi uvwa udila mujikùke awu kwambaye ne: “Lazàrô, pàtukà!” Ki muntu awu, mufwè ne mubolè, kudinyùkushayè ne kupàtùka mu lukitè, wenda wènda. Kakwèna cintu cilubidile nànsha cimwè pa bwalu abu to, kí mmwòmò anyi, bânà bèètù? Kamwèna dilubidila to!

156 Ncintu cimwècimwè aci dilòlò edi, pàdi Dîyi dijikùke dîdila dyàmba ne: “Ngènzàmpèkààtù, nyingàlâlà, Nènkupèeshè Mwoyi wà Cyendèlèlè.” Nyingàlâlaayi, muntu ne muntu wa kunùdi, nubatiijibwe mu Dîna dyà Yesù Kilistò bwà dilekelediibwa dyà mpèkàatù yènù, nènku nenùpetè kupà kwà Nyumà Mwîmpè. Ki dibìikila ndyòdi adi. Kakwèna cintu nànsha cimwè cilubidile pa Bwalu abu to.

157 Mémè ndi ntemù wa ne Bwalu abu mbulelèlè. Kùdi bantemù bakwàbò, miliyò ne miliyò pa buloba bujimà leelù ewu, bàdi bàjaadika ne m’Bulelèlè. Pàdi Bible ùlwa, Méyi à Nzambì, Dîyi dyònsò dyà Nzambì m’mpungi. Mwadi wònsò wà Dîyi ùdi mpungi, mpungi wa Èvànjeeliyò. Nènku padiYe ùdila, m’Bulelèlè. PàakambàYe ne: “Yesù Kilistò, umwèumwè awu makèlèlè, leelù, too ne kashidi,” kakwèna cintu nànsha cimwè cilubidile pa Bwalu abu to. Yèyè udi umwèumwè awu! Èyowà’s, mukalenge.

158 “Nyingàlâlaayi, nubatiijibwe mu Dîna dyà Yesù Kilistò, nenùpete kupà kwà Nyumà Mwîmpè.” Cintu nànsha cimwè cilubidile pa Bwalu abu.

159 “Ewu udi umvwa Méyi Àanyi ne witabuuja Ewu wàkaNtùma ùdi ne Mwoyi wà Cyendèlèlè. Ewu udi ungiitabuuja Mémè, nànsha byòbì ne mmufwè kàdi neikale ne mwoyi. Ewu udi ne mwoyi ne ungiitabuuja Mémè kàadyàkufwàku to. Udi witabuuja aci anyi?” Kakwèna cintu nànsha cimwè cilubidile pa Bwalu abu to: “Yèyè neikalè ne mwoyi!”

160 “Ewu udi udyà mubidi wànyì ne ùnwa Mashi àànyì ùdi ne Mwoyi wa Cyendèlèlè, ne Mémè nèmмуjuulè kàbìdì ku ditùkù dyà ndekeelu.” Kakwèna cintu nànsha cìmwè cilubìdìlè pa Bwalu abu to; nànsha cìmwè; Cìdi mwadi musungùlùke.

161 Kaa, ndi muCìmanyè, ngààkaCyùmvwa cidilè mu mwoyi wànyì mukwàte ne byà luse wà cyena Irlande ewu ditùkù kampànda, mémè, ngènzàmpèkààtù mukèsè wa kale. Mmunyi mùvwàci mwà kwenza bwànyì? Kàdi ngààkiitabuujà ne Cìvwa mwadi musungùlùke, mémè kuCìitaba. Mémè ndi ntemù wa ne Cìdi bulelèlà.

162 Dìngà ditùkù Yèyè neàbìikile kàbìdì, netùpàtùkè mu buloba. Bwalu kakwèna cintu cilubìdìlè pa bìdì bitàngilà mpungi awu to. Èyowà’s, mukalenge. Èyowà’s, mukalenge, kakwèna mwadi mulubidile to, dìbà kanà dyònsò.

163 Yèyè ùdi ùdila leelù ewu pàdìYe ùtùbìikila, bìdì ànu byà mwomùmwè pàdìYe ùtwàmbila cintu kanà cyònsò.

164 Mpindyewu, twàlukilàayi ku mvensà awu:

Ne . . . mōnaayi, nkwasà wa butùmbi wàkatèèkiibwa mu dyulu, (mvensà mwi2) ne muntu ùvwa musòmbepù.

165 Mōnaayi ne: “Nkwasa wa butùmbi,” Yèyè musòmbè pa Nkwasa wa butùmbi. Kàvwa kàbìdì mupingane mu bitèekedi byà myèndù mpindyewu, pa buloba to. Dyambwibwa dikaavwa dilwe. Ùvwa mu Butùmbi, musòmbè pa Nkwasa Wendè wa butùmbi. Ndi muswè bwà numòne kwinshi eku, netùsangane mene mu nshapità mwi5 ne, kacìvwa Nkwasa wa luse to. Kacìcìvwa Nkwasa wa luse kàbìdì to, cìvwa Nkwasa wa cilumbulwidi. Kacìvwa Nkwasa wa ngàsà to, cikaadi Nkwasa wa cilumbulwidi bwalu kapyà ne mikenyi ne makùbàkùbà bivwa bipàtukamù; kaciyi kàbìdì luse to, luse ndujike, cikondo cyà Èkèleeziyà ncijike. “Ewu udi mukooyikè àtùngunuke ne kwikala mukooyikè; ewu udi mwakàne àtùngunuke ne kwikala mwakàne; ewu udi wa cijila àtùngunuke ne kwikala wa cijila,” kacìcyenà kàbìdì Nkwasa wa luse to.

166 Dilòlò edi, Mashi àdi pa Nkwasa wa butùmbi awu ne n’nkwasà wa luse bwà ngènzàmpèkààtù yònsò udi ukeba luse. Kàdi mu ditùkù adi, kaciyàkwikala nkwasà wa ngàsà dìbà adi to, necìikalè nkwasà wa cilumbulwidi ne Nzambì wa cijji musòmbepù. “Mwaba ùdi . . . Piikala muntu mwakàne ùsùngidiibwa ne lutàtu, ngènzàmpèkààtù ne muntu mubì nebìikadile penyì?” Nànsha pàälwaYe mu matutu à butùmbi Bwèndè, mikùnà neyiteetè bwà kupeta kaaba kàà kusokomena. Netùshàadile penyì *twètù* aba, dìbà adi?

Kaa, lukòkà alu ndwa mushinga mukolè,
Lùdì lùmvwijà mutòòke bu nêjè;
Ncyèna mumanyè mukwàbò mpokolo to,
Ànu Mashi à Yesù.

167 Kaa, ekèlekèle, dileesònà kaayi's wè! Mwadi mulubìdile nànsha ùmwè! Ne Nkwasa Wendè wa butùmbi:

...ne Yèyè ùvwa musòmbe pa nkwasa Wendè wa butùmbi. (Yèyè kèna kàbidì kaaba aka to.)

168 Mpindyewu, aci ncintu cikwàbò, ncijaadiki cyà ne Èkèleeziyà mmwambwibwe kumpàla kwà Dikènga Dinène. Nwamònu anyi? Bwà cinyi? S'ki Yèyè ewu pa Nkwasa wa butùmbi mu Butùmbi, ne Èkèleeziyà ùkaadi muyè, ne pashiishe ke Dikènga dinène kulwadì.

169 Ntu misangu yònsò ànu mwambe ne mu matùkù à Noà, Noà ùkaavwa mu bwàtù kumpàla kwà dimata dyà mvùla dimwè kumatadì. Lotà ukaavwa mupatuke mu Sodomà kumpàla kwà kapyà kuponaku. Ne Èkèleeziyà neikale mu Butùmbi kumpàla kwà bómbe bwà mushindà kumatabù. Ncyà bushùwà, kumpàla kwà bómbe bwà mushindà kumatabù.

170 Wamba ne: “Kàdi mbishi bwà dyà kumpàla adi?” Dìvwa pa bampàngaanù, kí mbeena Kilistò to.

171 Mpindyewu, mònaayi. Kaa! Yèyè wàkajikija mudimu Wèndè pa buloba ne Yèyè mwangàte Èkèleeziyà Wendè, nènku mpindyewu Yèyè ùdi ùtùma cilumbulwidi. Bàà pa buloba bààkaMubènga, ne Yèyè wàkatùma cilumbulwidi Cyèndè. Yèyè ne Èkèleeziyà Wendè mbyayè mu Butùmbi.

172 Yone, mu cisanga cyà Paatèmò mwàmwa, mubuulwidi wa èkèleeziyà maalu, ùvwa cimfwànyì cyà Èkèleeziyà udi mwambwibwe mu Butùmbi ne: “Bandila kuulu eku!” Uleeja . . .

Wèwè udi wamba ne: “Ùvwa uleeja Èkèleeziyà anyi?”

173 Bwà ewu yònsò udi umvwa Dìyì edi, Yone wàkamuleeja mpàla. Amen! Yone ùvwa mwinyàmpalà wa Mashi à Yesù Kilistò, bujaadiki bwà Dìyì. Yèyè ùvwa ntemu wa dibatiiza dyà Nyumà Mwimpè, ne bwobùmwè bwà pàà nkàayèndè ne Kilistò, ne yèyè wàkaleeja mpàla wa Èkèleeziyà mujimà; ne, mulùme ne mukàjì yònsò, nsongàalùme ne nsongàakàjì utukù mwitàbùje Kilistò ewu, muMwitabe pa bishimikidi bimwèbimwè, neàbìikidiibwe dīngà ditùkù ne: “Bandila kuulu eku!” bwà kwambwibwa kumpàla kwà Dikènga dinène. Vùlukàayi ne, cikondo cyà Dikènga dinène kí ncyanji kutwàdija to.

174 Eci ki ciikala cikondo, cyàtwàdija cilumbulwidi. Mpindyewu mbaleeja Yone ciikalà mwà kwenzeka paanyimà pàà cikondo cyà Èkèleeziyà. Nwamònu anyi? Nànku, cìvwa ncyòci aci.

175 Mpindyewu, mònaayi kàbidì mu mvensà mwi3, anyi mwi2: “Nkwasa wa butùmbi mutèeka mu Dyulu, ne Ewu udi musòmbe pa Nkwasa wa butùmbi.” Mpindyewu, Nyumà umwèumwè uvwa pa buloba awu awu, ùkaavwa muumuke ne muye mu Butùmbi, ne mwikàle musòmbe (Yesù umwèumwè udi neetù dilòlò edi awu) mu luse, ùvwa muyè mu Butùmbi ne musòmbe pa Nkwasa wa butùmbi.

Ne ewu uvwa musòmbé pa Nkwasa wa butùmbi ùvwa ne mmwenekelu bu wa dibwe dyà yasàpà ne . . . sardwànè: ne kùvwa mwanzankòngòlò munyùngùlùkile eku ne eku kwà nkwasà wa butùmbi, wà mufwànàngàne ne diikala dyà mâyi à matàmba matàmbe kutwila.

¹⁷⁶ Nèngìkale mwà kwimanyika, bwalu kùdi bakwàbò bàna bèètù bàdi ne cyà kuyiisha.

Pàmwàpa nengàngatè eci mu dindà, ànu kaaba aka. Nànkú awu ne: “bwà kumwèka mufwànangane ne diikala dyà mâyi à matàmba à matàmbe kutwila.” Kaa, ekèlekèle! Kaa!

Kùdi bantu mu myaba pàmwè ne yònsò,
 Beena myoyi yidì yònsò yilakuka kapyà
 (Kanwenaayiku banange aci anyi?)
 . . . Kapyà kàakapweka dyà Mpenta,
 Kàakabàkezulà ne kubàvwija bakezùke aku;
 Kaa, ki kulàkukaKù mu mwoyi wànyì eku,
 Butùmbi kùdi Dìnà Dyèndè!
 Ndi ne disànkà be mùndi mwà kwamba ne ndi
 umwe wabò.

¹⁷⁷ Yone, mubiikidiibwe ne mubiikila kùdi Mukalenge Yesù, mulayiibwe kùdi Nzambi kale wàwa bwà kumònyaye dilwa dyà Mwànà wa muntu. Peetèlò, Yakòbò, ne Yone, ne bakwàbò biimane mwaba awu, pààkaakula Yesù naabò ne kwamba ne: “Kùdi bàmwè bàdi biimane mwab’ewu biikala kabàyi mwà kulabula lufù to too ne pààmònabo Mwànà wa muntu ùlwa.” Yèyè kàakambakù ne *buònsò* bàvwa biimàne mwaba awu to, kàdi *bàmwè*. Ki kuyabò, matùkù makesè paanyimà pàà cyòci aci, ne kumònabo bulondyanganyi bwà dibiikà dyà ku lufù bwambulula, ne dilwa dyà Mukalenge.

¹⁷⁸ Eliyà ùvwa uleeja bansantu bafwè . . . Ndi njinga kwamba ne Mòsà, ne babiike ku lufù. Eliyà ùvwa uleeja musumbà wa batentèmunyiibwe awu. Vùlukàayi ne, Mòsà ùvwa wa kumpàla, ne pashìishe Eliyà. Eliyà ùvwa ne cyà kwikala mùsànjeela wa ditùkù dyà ndekeelu, uvwa ne cyà kufika ku dibiika dyà ku lufù ne musumbà wèndè . . . ùvwa mwà kulwa . . . èè, cìvwa mwà kufika ku Dyambwibwa, mùndi muswè kwamba. Mòsà wàkabweja dibiikà dyà ku lufù ne Eliyà wàkabweja kasumbù kàà Bambwibwe. Nènku, kwòko aku, bùbìdì bwàbò bàvwa balejiibwekù.

¹⁷⁹ Ne paanyimà pàà katancì bàakamòna dibà adi, ne kumònabo, ne Peetèlò kwamba ne: “Twibake ntentà yisàtù. Bàmwè bàye mwinshì mwà mikenji, ne bàmwè bàye mwinshì mwà Eliyà, nènku tuyaayi (bàmwè bàà kùdìbo) mùshindù ewu.”

¹⁸⁰ Nènku pàcìvwabo ànu munkaci mwà kwakula apu, Díyì kwakula dyàmba ne: “Ewu m’Mwanàanyi munanga, Mutèèlèjaayi.” Nènku pàakatàngilabo, kumònabo ànu Yesù,

bintu byônsò bìvwa byengùlùke mu Umwèpelè. Kaa, ne Yèyè nguwva Bukênkè, Bulelèlà, Njila, Ciibi, Mwanzankongòlò.

181 Kaa, mààlabà tudi ne dileesòna dinène, bu Mukalenge mwà kwanyisha. Mààlabà netwàngate “manyooka”; tudi twangata “dibwe dyà sardwànè,” bwà kumòna cididi dileeja, didi ne mudimu kaayi. Nènku tуди twangata dyà—dyà—dyà “yasàpà” ne twangata kùdì...mabwe ônsò mashiièshiièlangane, ne twangacila ônsò aa ku Yèhezèkèle, kwalukila mu Genèsè, kwalukila too ne ku Bwàkabuulwibwà, kupweka too ne munkacinkacì mwà Bible, kuciswikakaja pàmwè, mabwe mashiièshiièlangàne aa ne meekala, ne bikwàbò. Ne pashiishe tudi twalukila naabi ànu buludi paanyimà ku aci bwà kumòna ní kí mbyòbì. Nwamònu anyi? Kumòna ní kí ndiikala dimwèdimwè adi ne byônsò, cintu ànu cìmwècìmwè aci. Ne Nyumà Mwimpè umweumwe awu, Nzambì umweumwe awu, uleeja bimanyinu bimwèbimwè abi, maalu à kukema àmwèàmwè awu, wenza cintu cìmwècìmwè aci ànu mwàkalayàYe!

182 Wàkambila Peetèlò, Yakòbò, ne Yone, ne bakwàbò biimàne mwaba awu, bayiidi Bèndè bwònsò abu, kwamba ne: “Bàmwè bàà kunùdi kabààkumòna lufù to too ne pààmònabo Mwànà wa muntu ùlwa mu Bukalenge Bwèndè.”

183 Wàmabila Yone, wàmaba...Peetèlò kwamba ne: “NeWènzè nendè cinyi? Yèyè...Muntu awu—awu, cyàmufikila ncinyi?”

184 Yèyè ne: “Bwènù mbwèpì piikalaye mwà kuMmòna ndwa?” Nènku Wàkamulekela ne mwoyi bwà kucimònayè's! Paanyimà pàà bakwàbò abu bamane kufwà ne bayè, Yone wàkashààla ne mwoyi bwà kumòna dilwa dyà Mukalenge didyànjila kumuleeja mu bukolè, bwalu bujimà abu bubangila ku cikondo cyèndè too ne ku dijika dyà Bilumbulwidi ne pàdì Bukalenge bwà bidimu cinunu bubanga. Yone wàkamòna kantu ne kantu kààcì kwònsò, ne ndekeelu wa Bukalenge bwà bidimu cinunu, ne mbangilu wa Cikondo cyà Bukalenge. Pa nàнку Yèyè ùtu ùshààla mukwàte ku Diyì Dyèndè, kí mmwòmò anyi?

185 Netùcifùnda ku mvensà mwi2. Bu Mukalenge mwà kwanyisha, netùbangè ne mvensà mwi3 mu dindà.

Twinyikààyi mitù yètù.

186 Mbanganyi dilòòlò edi, mu èkèleeziyà ewu, bàdì bamanyè, mwanèètù wa balùme, ne, (mwanèètù wa bakàji), bwà ne ùbiièkidiibwe dínghà ditùkù, nànsha wèwè mudìlongolole anyi to? Nànsha wèwè mudìlongolole anyi to, ùbiièkidiibwe bwà kutuutakeena ne Nzambì. Mpungi awu neàdile; ne pààdilayè, neàdile bwà kukupiièsha, mu mwaba uwikala kuciyi kàbìdì ne mwoyi to ne uwikala mukengèshiièbwe mu biina byà dyabùlù byà mu iferno pàmwàpa munda mwà miliyò yà bidimu, anyi necikubiile mu Dyulu bwà katuutakeena ne Bansantu bàà butùmbi.

¹⁸⁷ Ànu mùdìbi bushùwà ne Nzambi wàkalama Dìyì Dyèndè kùdì Peetèlò, Yakòbò, ne Yone; ànu mùdìbi bushùwà ne Yéyè wàkaDilama kùdì Yone munanga awu, mubuuludi; ànu mùdìbi bushùwà ne Yéyè wàkalama mulayì Wèndè munda mwà bikondo byà èkèleeziyà; ncyà bushùwà ne Yéyè wàkalaya mu matùkù à ndekeelu aa ne Yéyè mmufwànyine kutùma mvùla mushiishe ne mufwànyine kwaluja Nyumà umwèumwè awu ùvwa pa buloba munda Mwèndè awu, Bukènkè nebùlwe mu cikondo cyà ìbaamulòlò bwà kuleeja Bukolè bùmwebùmwe abu, bimanyinu bimwebimwè abi, ne byònsò byàkenzàYe mu ditùkù Dyèndè abi Ùvwa mwà kubìleeja cyàkàbìdì mu “Ciibi cyunzulula” mu ditùkù dyà ndekeelu.

¹⁸⁸ S'ki Cyôci eci! Tudi naaCì mpindyewu mene, Nyumà Mwimpè, Yesù Kilstò, umwèumwè awu makèèlèlè, leelù, too ne kashidi. Nudi. . . Cìdì cinùyiisha, Cìdì cinùlongesha, Cìdì citeeta kunùfikisha ku dimòna cidì cimpè ne cibi. N'Nyumà Mwimpè Yéyè mwinè munkaci mwà kwakwila ku mishikù yà buntu, ùkwàcila mudimu munkaci mwà bantu, ùteeta bwà kuleeja luse ne ngàsà.

¹⁸⁹ Nènku nwènù kanùyi banji kumupeta to, mu dilòlò dyà Mulàadilu wà Cidimu Cipyacipyà eci ewu nudiku mwà kuswa bwà kwela byanza byènù muulu kùdì Nzambi ne kwamba ne: “Nzambi, ndekeleku ngààkidile Bukolè bùvwa pa Yone mubuuludi, bwà ne pambiikilabo ngàmwènèka kumpàla Kwèbè mu ditalala mwakenzaye” anyi? Juula cianza cyèbè muulu. Nzambi àkubènèshè. Nzambi àkubènèshè. Ànu bwònsò mu èkèleeziyà mujimà. Nzambi ànùbènèshè. “Ndilongòlòlèku bwà kwandamuna ku mabiikila àànyi.”

¹⁹⁰ Taatù wetù wa mu Dyulu, bu mùdì Mulàadilu wà Cidimu Cipyacipyà eci. . . ànu mu mèbà matwè bu ku àbìdì mpindyewu nènku nekùjike, nekwikale cidimu cipyacipyà. Citùdì benze mu cidimu eci tukàadi bacyenze. Bintu byàbùngì bìndì mwenze, ne, ndi ndyumvwa bundù; ndi nyingalala bwà byòbì abi, Mukalenge.

¹⁹¹ Nènku kùdì bintu byàbùngì bìndì mwénze bìdì bààbùngì bàà ku bàna bèètù kabàyi buumvwe. Bààbùngì bàà ku bàna bèètù bàdì mu budimi bwà bwambi kabèèna buumvwa ne mbwà cinyi ngaakabyenza to. Kàdi, Taatù, ngaakabyenza bwalu mvwa mulombòdiibwe bwà kubyenza. Ndi ndòmba, Taatù, bwà Wèwè kundekèdiku mfwishiiibwè bundù bwà dilombodiibwa dyà mùshindù awu to. Kàdi ndomboleku, Mukalenge, bwà kutungunuka ne kwenza ànu mùndì mulombodiibwe bwà kwenza amu. Nkwàcishèku, Nzambi, bwalu ndi nkeba ne meeji matòoke wònsò bwà kumanya diswa Dyèbè, bwà ngaamòna mwà kudýenza bwà kutwàla (bu Muwàkandeeja kukaadi bidimu byàbùngì pangàakashiya èkèleeziyà ewu) Dyâmpà dyà Mwoyi kùdì bantu bàà pa buloba. Pàngàakamòna mukùnà munène wa Dyâmpà awu, ne Bansantu bavwàdika bitòoke bàfùmina nseke ne nseke yònsò yà buloba bwà kudýa Dyâmpà dyà Mwoyi edi. Éyi

Nzambì, ndekeleku—Éyì Nzambì, kundekèdiku, kumfikishiku ku dipanga kudiisha cisàmbà Dyâmpà dyà Mwoyi to.

¹⁹² Bènesha misùukà yìdì ne nzala yìdì myele byanza muulu ànu mpindyewu eyi. Bàdì bàkeba Mwoyi mutambidile. Ndi ndomba bwà Wèwè kubùja ne Nyumà Mwîmpè, Mukalenge, yònsò wa kùdibo. Nzambì, enzàku nàнку. Bâpèèshèku mabènesha. Kwàcishàku bânà bèètù, myaba yònsò.

¹⁹³ Bènesàku bambi neetù bàdì bàdìlongolola bwà kubanda cyàkàbidì, mpindewu mu tusunsa tukesè emu, bakwàbò nebiiikale munkaci mwà kuyiisha. Tudi tulòmba bwà bwòbò kutùpa Dyâmpà dyà Mwoyi dilòlò edi, Taatù, bu mutwàtèèleja ne ntema yònsò ne kaneemu kònsò bwà kuumvwa Dìyì adi. Enzàku nàнку.

¹⁹⁴ Tubènesheku. Nè swàku bwà cidimu cipyacipyà eci kucyàci ne ditèkemena dipyadipyà, citùtwàdila meeji mapyamàpyà, mabuulula mampyamàpyà, bukolè bupyabùpyà, kaa, bintu byònsò. Swàku bwà mabènesha Èbè ne milayì bìvwijiibwe bipyabipyà, cyàkàbidì, Mukalenge. Tudi tudilàmbula, ne disambila dyètù, mu byanza Byèbè. Mu Dîna dyà Yesù Kilstò. Amen.

Twasàkidilaayi, bânà bèètù bàà balùme ne bàà bakàjì.

¹⁹⁵ [Mwanèètù Neville ùdì wàkula ne: Ndi mutwìshùibwe ne tudi mwà kusànka bwònsò bwà ne katùvwa mu dilwijakaja to nànsha kakesè ne bafwànyine kwikala bacyonkòmoke bwà kwikala batùngunuke ne kutèèleja Mwanèètù Branham mwab'ewu dilòlò edi utùtwadila mukenji ewu. Ne m'Mukenji wùdì wùtùkolesha ku mwali bwalu tudi bamanyè ne Nzambì ùdì munda Mwàwù. Amen.] Mukalenge àtumbè!

¹⁹⁶ [Ne bwà cidiYe mwambè Yèyè ùdì ne bukolè bwà kucyènza mene too ne ku dilwa Dyèndè.] Èyowà. [Ne Yèyè neàcyenze, kí ng'ànu aci to, ndi misangu yàbùngì ngàmba aci. . . tutu twàmbila bantu misangu yàbùngì ne: “Udi witabuuja ne Yesù Kilstò ùdì mwà kukwondopa anyi?” nènku, mu bushùwà bwà bwalu, pa ciibidilu udi mwà kubàfikisha ku diciitaba. Kàdì bwalu bùdìku mbwà ne: “Udi witabuuja ne Yèyè neàkwondope *mpindyewu* anyi?”] Amen! [Dìbà adi bantu bàtu misangu mikwàbò bàmba ne: “Èè, ncyèna mumanyè to.”]

¹⁹⁷ [Inàbànza udi ufuma ku difwa ku lùpitaadi kwaka, mvwa muyemu bwà kumumòna, yèyè ne: “Mwanèètù wa bakàjì, ucidi ànu witabuuja ne Yesù ùdì ùsùngila anyi?”]

[Yèyè ne: “Èyowà, ndi ngiitabuuja.”]

[Mèmè ne: “Udi witabuuja ne Yesù Kilstò ùdì wòndopa anyi?”]

[Yèyè ne: “Èyowà's, mukalenge, ndi ngiitabuuja.”]


[Mèmè ne: “Udi witabuuja ne Yèyè ùdì ùkwondopa ànu mpindyewu mene anyi?”]

[Yèyè ne: “Aci ncyèna mumanyè to.”]

[Ki mèmè ne: “Mwanèètù wa bakàjì, udi mwà kucimanya bwalu mulayi wùdi bwèbè.”] Amen! [Amen. Yèyè ngudi mufile mulayi.]

¹⁹⁸ [Mpindyewu, patwikala mwà kutèeleja mukwàbò wa ku bânà bèètù mwab’ewu. Tudi ne bavule lwà mu nyungulukilu emu ne eci. . . Mu Mulàadilu wà Cidimu Cipyacìpyà emu, katwèna ne ndongamu kampànda mudyanjila kulongolola to, tudi ànu tudisangisha ne tulekela Nzambi ùkwàta mudimu mùdiYe ùlombola ne ùludika.] Amen! [Nènku nudi bamanyè’s, kukaadi kupite cikondo cile kacya twàtèeleja Mwanèètù Pat Tyler, ne kufila bujaadiki bwèndè anyi cyònsò cidi Mukalenge mutèeke pa mwoyi wèndè aci. Nènku netùlombè Mwanèètù Pat bwà kutwàlaye cyònsò cidi Nzambi mutèeke pa mwoyi wèndè aci.]

¹⁹⁹ [Kàdi kumpàla kwà kubandaye, mwanèètù kampànda mwímpè mwena Kilistò lwà paanyimà pàapa, Mwanèètù Randall Hyman, nènku yèyè ùdi mwab’ewu ne ùdi ne cipèèdi bwà kwimbila Mukalenge ne nudi bamanyè’s, ndi ànu mujinge bwà àmonàku mwà kukwàta mudimu ne cipèèdi aci bwà Butùmbi bwà Nzambi, pa nànkù néndòmbe Mwanèètù Randall ní ùdi mwà kubànda bwà kutwimbila. Ùkaadiku mutwimbile musangu ùmwè anyi yìbidi mwab’ewu ne némulòmbe bwà kukwàta mudimu ne cipèèdi cyèndè kàbìdi dilòlò edi bwà Mukalenge Yesù, bu yèyè mwà kuswa. Ní ùdikù mwà kulwa kutwimbila mpindyewu. Yèyè ùdi ne nsongàalùme lwà paanyimà pàapa bàdiye uteeta bwà kubeja, kàdi pàmwàpa ùdi mwà kubàshiya mpindyewu bwà kubànda apa bwà kutwimbila.]

²⁰⁰ [Pàdiye munkaci mwà kucyènza apu, tudi kàbìdi ne Mwanèètù Kinder lwà paanyimà apa, mwanèètù munanga mwena Mpenta, tudi ne disànkà bwà bwalu bwèndè. Nènku tudi ne Mwanèètù J.T. Parnell paanyimà pàapa mwaba kampànda, ngeela meeji ne mmusòmbe ànu lwà paanyimà apa pambèlu pàà mulongo. Ne disànkà dikolè bwà bânà bèètù beena Kilistò bímpè bwònsò aba,] Beeler *kwàka*. [bânà bèètù bàà diitabuuja. Nènku twànjibi kumòna,] Mwanèètù Beeler udi paanyimà *pàapa* wàwa. [Mwanèètù Beeler udi paanyimà *apa*, yèyè pèndè. Èyowà. Mwanèètù Beeler ùdi kaaba aka ne . . . —Muf.] 

60-1231 Bwàkabuulwibwà, Nshapità Mwinâyì Citùpà I
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org